

इब्रि इब्रि लोकल्कुनाहाटी रासता सिट्टि

इद सिट्टिता बारेमते गिचचो परिचयम

येसुना सिस्स्युल्क येसुना बारेमता बेसता कबुरतुन दुनियाते होंचि वेहतुर. अदुनहाटी वेल्लेन यहूदिल्क येसुनपोर्रो विस्वासम कीतुर. पजा ओर वेंरे लोकल्कुनाहेंदाल वेल्लेन तकलिपकु बोगांचतुर. अस्के, आ यहूदि विस्वासुल्क येसुनपोर्रोटा विस्वासमतुन होळसि मर्रा पळाना रीति-रिवाजकुन पीसि ताककोमे इंचि विचारम कीतुर. इल्हा विचारम कियाना आ यहूदि विस्वासुल्कुना दैरनेमतुन बेसांगोटनाहाटी, येसुना वरोर बक्तुड ओर्क ई सिट्टि रासतोर.

पडाना नियम परकारम पेनदा बद इच्चा अय्ते पुरागा आया हिल्लेनो, आ इच्चातुन येसु किरिस्तु पुरागा कीतोर इत्ता पोल्लें, इद सिट्टिते वेल्लेन उदाहरन हीसि रासि मंतां. कास कीसि इद सिट्टिते मूड पोल्लें मनाकु दोर्कतां:

(1) येसु किरिस्तु पेनदा मर्रि आंदुर, ओर कुद्दु तकलिपकु बोगांचेके पेनदा इच्चातुन पुरागा कियालय तयार आतोर. ई येसु किरिस्तु इत्ते, पेनदा अन्नि दूतांकन्ना, पेनदा कबुरतोर्कन्ना, मनकालोर्कुक्कन्ना बच्चोनो पेद्दोड आंदुर.

(2) येसु किरिस्तुंकन्ना मुन्ने मत्ता पेद्दा पेर्मालोरा लोप्पोटाल, येसु वरोरे बस्केळक जीवाते मनना पेद्दा पेर्मल इंचि पेन रुजुव कीसि हुपिस्ता.

(3) जिवरासिना मोक्कुल्क आनि रीति-रिवाजकु मनाकुन पापमताल पिसागोट्टंतां इंचि यहूदिल्क नम्मंदुर, गानि सिराप येसु किरिस्तु वरोरे, पापमताल, हामुरताल, हामुरता वेंरताल पिसागोटा परंतोर इंचि इद सिट्टिते रासतद मंता.

बगा बतल मंता

किरिस्ते पेनदा मर्रि, वारसदार आनि महिमा आंदुर 1:1-3

किरिस्तु पेनदा दूतांकन्ना पेद्दोड आंदुर 1:4-2:18

किरिस्तु मूसाल आनि येहोसुंकन्ना पेद्दोड आंदुर 3:1-4:13

किरिस्तुना पेर्मलतनम अंटवुंकन्ना पेद्देद आंद 4:14-7:28

किरिस्तुनाहेंदाल वाता करार अन्नि करास्कन्ना पेद्देद आंद 8:1-9:22

किरिस्तुना मोक्कु अन्नि मोक्कुलकुंकन्ना पेद्देद आंद 9:23-10:39

किरिस्तु विस्वासमकन्ना पेद्दोड आंदुर 11:1-12:29

आकिरता बोदां आनि आदेसाल्क 13:1-25

येसु किरिस्तु पेनदा मर्रि आंदुर

1 वेल्लेन मुन्नेटा कालमते पेन बच्चुंगो मल्कां बच्चुंगो तीरकुने पेनदा कबुरतोराहेंदाल मना तादो-बाबुरतोनि वळ्ळता.

2 गानि ई आकिरता रोजकुने बारे, पेन दाना मर्रिनाहेंदाल मनातोनि वळ्ळता. दाना मर्रिनाहेंदाले इद पूरा दुनियातुन तयार कीसि, ओन ई दुनियाता वारसदार इंचि निलाहता.*

3 आ मर्रि पेनदा महिमाता वेलगु आंदुर. इंका पेनदा गुनम आनि मर्रिना गुनम उंदेतीर मंता. मर्रि ओना बलमगल्ला पोल्लेने ई दुनियातुन ताकिच्चेके मंतोर. ओर मना पापालकुनंता नोर्सि मनाकुन पवित्र कीतोर. पजा एत्तुने स्वर्गमते मंदना अन्निटकन्ना पेद्दा पेनदा तिना बाजुंक होंचि उदतोर.*

येसु पेनदा दूतांकन्ना पेद्दोड

4 इल्हा ओर पेनदा दूतांकन्ना वेल्ले बेस पोरोल आनि कदर दक्किचकुत्तोर.

5 बारिल्ले, पेन दाना मर्रिना बारेमते,
“निमे नावा मर्रिन आदिन, इय्याला ननाने नीकुन पुटिस्तन. * इंका
नना ओना बाबोन आंदुन, ओर ना मर्रि आंदुर.”*
इंचि येसुन तप्पा बस्केने बदे दूतातुन पेन इना हिल्ले.

6 इदे आयवा, बस्के अयते पेन दाना तोल्सूर मर्रिन बूमितगा तत्ता, अस्के, “पेनदा अन्नि दूतां ओन मोळ्ळिंक,”* इंचि इत्ता.

7 पजा पेन दाना दूताना बारेमते वेहतस्के, “अद दाना दूतन वळिलेहका आनि दाना सेवकुल्लुकुन पोत्तना तळ्ळिलेहका कीता,”* इंचि वेहता.

8 गानि दाना मर्रिना बारेमते,
“पेनदुना, नीवा राजगद्दे बस्केळ्ळ निल्सि मनंता,
निमे नीतिते राज्येम कियानदुन आदिन.

- 9 सत्तेमतुन निमे पावरम कीतिन, सत्तेम हिलुवादान निमे हय्सिन.
 अदुनहाटीगे नना, नीवा पेनबाबन, नीवा दंटातोरा लोपोटाल नीकुन पेरसि,
 वेल्ले आनंदमता निय होक्सि नीवा अबिसेकम* कीतन,”✠
 इंचि पेन इत्ता.
- 10 इच्चोने आयका, पेन दाना मरिना बारेमते,
 “सामि! मोट्टा मोदाला बूमिक पुनादि दोहतोन निमेने आंदिन.
 मब्बुकुन नीवा कय्दे तयार कीतिन.
- 11 अव अन्नि नासडेम आसि होनानुं, गानि निमे बस्केळ्ळक मनांतिन,
 कपडिं पडन आसि हसोत्ताप, अव अन्नि पडानव आसि होनानुं.
- 12 निमे सेदूदरतुन आटमूट कीताप, अवुन आटमूट कीकिन.
 अव कपडिनालेसीं बदलांचनुं, गानि निमे मात्रम बस्केळ्ळक उंदेतीर मनानोन
 आंदिन,
 नीवा कालाल्क बस्केने मारों,”✠
 इंचि इत्ता.
- 13 मर्रा, “बदवेरदाका अय्ते नीवा पगातोरुं नीवा काल्कुना हिळु तर्रीन
 अदवेरदाका,
 निमे नावा तिना बाजुंक उद्दिदसि मन्नु,✠ इंचि बद्दे दूतातुन बस्केने पेन इना
 हिल्ले.”
- 14 पेनदा अन्नि दूतां दाना सेवा कियाना आत्मांगें आयोंगां! बोर्क अय्ते पापाल्क
 मापि आसि मुक्ति दोर्कतनो ओर्कु सहायम कियानाहाटीं पेन इवुन लोहांता.✠

2

अन्निटकन्ना मंचि मुक्ति

1 अदुनहाटीं मनम केंजता सत्तेम पोल्लेनाल लक्कु आयामन्नि इंचि अवुनहेके
 मनम बेस लक्से हियगोम.

* 1:9 अबिसेकम राजाल आसि राजगद्देपोर्रीं उपिच्चका मुन्ने ओना अबिसेकम किया पीता. ✠ 1:9
 बजन सहिता 45:6-7 ✠ 1:12 बजन सहिता 102:25-27 ✠ 1:13 बजन सहिता 110:1;
 मत्तयाल 22:44; मरकुस 12:36; लूकाल 20:42-43 ✠ 1:14 बजन सहिता 103:20-21

2 बारित्ते, पेनदा दूतानाहेंदाल वेहता पोल्ले सत्तेम इंचि रूजुव आता,☆ अस्के आ पोल्ले परकारम कबळ कियाका तप्पु कीतोर्कु आनि ताकुबोर्कु दग्गुता सिक्सा दोर्कता.

3 अय्ते इच्चोर पेद्दा मुक्तिता कबुरतेके लक्से इर्काकोटे, वायाना सिक्साताल मनम बल्हा तपिच्चुना परीतोम? इदुना बारेमते मोट्टा मोदाला सामिए वेहतोर. अद कबुरतुन सामिनगटाल बोर अय्ते केंजतुरो, ओर अद कबुरतुन मनाकु तेळियागोट्सि रूजुव कीतुर.

4 अचोने आयका पेनगुडा चिन्हां, इचंन्रमता कबाह्क, तीराता अद्बूतालक आनि पवित्र आत्माता वराल्क दाना इच्चा परकारम दाना बक्तुलकुंक हीसि, ई मुक्तिता बारेमते गवाइ हीसेक मत्ता.

येसु मनकना रूपमते मारियमळ

5 मुन्ने वायाना बद दुनियाता बारेमते मोमोट वेहचंतोम, आ दुनियातुन पेन दाना दूताना कय हिल्ले इर्ग हिल्ले.

6 इदुना बारेमते दर्मसास्त्रमते उंदगा बोरो वरोर गवाइ वेहासेक इल्हा इत्तोर:
“मनकल इत्ते असल बोर आंदुर, ओना बारेमते निमे इच्चोन विचारम कीसंतिन.
हिलाकोटे निमे इच्चोर पिकिर कियनाहाटी,
असल मनकना रूपमते पुटतोर बोर आंदुर?

7 निमे ओन पेनदा दूतांकन्ना गिचचो सिन्नगा कीतिन,
गानि निमे ओन्क पेद्दातनम आनि कदरता किरिटम हीसि,
निमे नीवा कय्दा कबाह्कुनपोर्गे ओन्क अदिकारम हीतिन,

8 अन्निटतुन ओना काल्कुनगा इरतिन.”☆

इंचि इत्तोर. पेन अन्निटवुनपोर्गे ओन्क अदिकारम हीता, ओना अदिकारमते हिलाकोटा बतातुने होळसा हिल्ले. गानि इंदके अन्नि ओना अदिकारमते मत्ताप दिस्सेक हिल्ले.

9 अयना जेरासेपताहाटी पेनदा दूतांकन्ना सिन्नागासि मत्ता येसुन मनम हळसंतोम. पेनदा कुर्पाहेंदाल अंतोर मनकालोरहाटी ओर ओना जीवातुन हीसि हामुरता रुसि हळतोर. हामुरतुन सहन कीताहाटी पेन ओन्क पेद्दातनम आनि कदरता किरिटम केराहता.

10 पेन अन्नित्वुन सतताहाटीं तयार कीता आनि सतागे अन्नित्वुन ताकिच्चंता. आ पेन दाना महिमाता राज्येमते वेल्लेन मंदितुन सतता मर्क-मियाहक कीसि तरांनाहाटीं, दाना सतता मरिं येसुन पेरता. मनाकु मुक्ति दोर्कगोम इंचि येसुन अद वेल्लेन तिप्पल्कुनतोनि ओन पुरागा कीता.

तम्पुर-हेलड इनालय येसु सिग्गु अर्रोर

11 मनाकुन पवित्र किय्याना येसु आनि पवित्र आतोरम मनम, वरोर बाबाना पिलाल्कुमे आंदुम. अदुनहाटीं मनाकुन तम्पुहक-हेलाहक इंचि वेहालय येसु सिग्गु अर्रोर.

12 अदुनहाटीं,

“नावा तम्पुहक-हेलाहक-नीवा पोरोल वेहकन,
कलिसियातोर मुन्ने नना नीकुन तल्सकुनकन,”*
इंचि ओर पेनदुन इत्ता पोल्ले दर्मसास्त्रमते रासतद मंता.

13 मर्रा,

“नना पेनदापोर्रो बरोसा इर्रातन.” अचोने आयका,
“इगे नना, नाकु पेन हीता पिलाल्कुनतोनि मंतन,”*
इंचि दर्मसास्त्रमते रासतद मंता.

14-15 पेनदा पिलाल्क आता मनम, मेंदुल रूपमते मत्ताहाटीं येसुगुडा हरेक पोल्लेते मनालेहका आसि वातोर. मना पिस्वरंता हामुरता वर्रे मनागा मत्ताहेंका देय्यमता अदिकारम मनापोर्रो मत्ता. गानि येसु ओना हामुरताहेंदाल, देय्यमता अदिकारमतुन नासडेम कीसि, मनाकुन हामुरता वर्रेताल इळबळिस्तोर.

16 पेनदा दूतांक सहायम कियालय येसु असले वायाहिल्लोर गानि अब्राहामुना वंसंमतोर्के सहायम कियालय वातोर.*

17 इदुनाहाटीं येसुक अन्नि तीरकुने ओना तम्पुहक-हेलाहकुनलेसीं रूपम येतमळ अक्सरम मत्ता. इल्हा रूपम येतते ओर पेनदा मुन्ने सेवा कियाना वरोर दयागल्लोड आनि विस्वासमलायक पेद्दा पेर्मल आंतोर. अस्केन ओर लोकल्कुना पापाल्कुनाहाटीं मोक्कु हिय्या पर्रतोर.

18 ओर कुद्दु परिकसाते अर्सि तिप्पल्क बोगांचि मंतोर, अदुनहाटीं इंदके बोर अय्ते परिकसाते अर्सि तिप्पल्क बोगांचंतुरो, ओर्कु ओर सहायम किया पर्रतोर.

* 2:12 बजन सहिता 22:22 * 2:13 यसायाह 8:17-18 * 2:16 मनम येसुन विस्वासम कीतोम इंचि, मनमगुडा अब्राहामुना वंसंमतोरमे आंदुम.

3

येसु मूसांकन्ना पेद्दोड

1 अदुनहाटी, पवित्र विस्वासुल्कुनिटा! मुक्तिता पालिगाहक आयालय पेन मीकुन केयता. येसुन पेन पेद्दा पेर्मल आनि प्रेरित आयालय लोहचीता इंचि मनम ओप्कुत्तोम, अय्ते ओना बारेमते मिमेट विचारम कीम्टु.

2 पेनदा पूरा कुटुंबमते मूसाल अन्नि कबाहकुने विस्वासमलायक मत्तोर, अल्हेने येसुगुडा ओन निल्हाता पेनदाहाटी विस्वासमलायक मत्तोर.

3-4 हरेक लोतुन दोहानोर बोरन्ना वरोर मनकल मनंतोर, गानि अन्निन तयार कीतोर मात्रम पेने आंदु. बल्हा अय्ते लोतुकन्ना लोन दोहानोंक एक्को कदर मनंता, अल्हेने येसुगुडा मूसांकन्ना एक्को कदरगल्लोड इंचि पोरोल तरकुत्तोर.

5 वायाना कालमते पेन बतल-बतल अय्ते वेहाना मंतानो, अबुना गवाइ लोकुल्कुंक वेहनाहाटी मूसाल, पेनदा पूरा लोतोरगा वरोर विस्वासमलायक सेवक आसि मत्तोर.

पेनदा लोकुल्कुना आरामता बारेमते

6 गानि पेनदा विस्वासमगल्ला मरि, किरिस्तु, पेनदा पूरा लोतोरगा अदिकारि आसि मत्तोर. मनमगिंटा मना विस्वासम आनि आसेता बारेमते आकिरदाका इरगा गट्टिगा मत्ते, मनमगुडा पेनदा लोतोरम आसि मनंतोम.

7-8 अस्के पवित्र आत्मा दर्मसास्त्रमते इल्हा इंता:

“मिमेट इय्याला पेनदा पोल्लें केंजानय्ते,
पेन वेहतद मोमोट केंजोम इंचेके,
इस्त्राएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,
अल्हा मिमेट मीवा मनसुकुने मुजोरि कियमट.

9 अगा नल्पै वर्सनदाका नना कीता कबाहकुन हळसिगुडा,
मीवा पेद्दाल्क परमेर्का कीसि नावा पट्टु हळतुर.

10 अदुनहाटी नना आ पीळिता लोकुल्कुनपोर्रो होंग पीसि,
‘ईरा मनसु बस्केळ्ळक नहागटाल तप्सोंचि लक्कु मनंता,
ईर नावा हरदुन बस्केने एरपाट किया हिल्लुर,’

इंचि ओर्कुन इत्तन.

11 अदुनहाटी नना होंगुने, ‘ओर्कुन आराम दोर्कना जेगाते बस्केने होळिया हिय्योन,’

इंचि ओट्टु तिचि वेहतन.”☆

इंचि इत्ता.

12 विस्वासुल्कुनिटा, जेगर्ता! जीवाते मंदना पेनदापोर्रोटा विस्वासमताल लक्कु कियागोट्टनसोंटा कराब, विस्वासम हिलुवा मनसु, मीलोप्पो बोरगेन मनानायो.

13 गानि पापम मीलोप्पो वासि मीवा मनसु मुजोरि कियाकोंटा मननाहाटी, “इय्याला” इनना वेला मनानेकेने दररोज वरोंक-वरोर दैरनेम हीसेक मंटु.

14 बारित्ते, सुस्वने मनम इर्ता बरोसातुन मना पिस्वरता आकिरदाका गट्टिगा पीसि मत्तेन, मनम किरिस्तुना पालिगाहक आंतोम.

15 दीनकन्ना मुन्ने दर्मसास्त्रमते इल्हा वेहतद मंता:

“मिमेट इय्याला पेनदा अल्किर केंजानय्ते,

पेन वेहतद मोमोट केंजोम इंचेके,

इस्त्राएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,

अल्हा मिमेट मीवा मनसुकुने मुजोरि कियमट.”☆

इंचि रासि मंता.

16 पेनदा पोल्ले केंजसिगुडा दाना विरोदमते ताकतोर बोर आंदुर? मूसानतोनि कलियसि इजिप्त देसेमताल पलाते अरता आ अंतोर लोकुल्के गदा!

17 नल्लै वर्सनदाका पेन बोरा पोर्री होंग पीसि मत्ता? पापम कीसि बय्लि जेगाते बोरा पीनगुल्क अय्ते अर्सि मत्तांगो, ओरा पोर्रेन आयोना?

18 “ओर्कुन आराम दोर्कना जेगाते बस्केने होळिया हिय्योन,” इंचि पेन बोरा बारेमते ओट्टु तित्ता? दाना पोल्ले परकारम बोर अय्ते ताका हिल्लुरो, ओरा बारेमतेन गदा!

19 इल्हा ओर्कु विस्वासम हिलुवाहेंकेन, ओर आराम दोर्कना जेगाते होळिया पराहिल्लुर, इंचि मनाकु तेळियंता.

4

आराम दोर्कना जेगाते होळियमळ

1 आराम दोर्कना जेगाते होळियाना बारेमता पेन हीता पोल्ले, इदवेरदाकागुडा ताकसेके मंता. अद मना लोप्पोटाल बोनागटालन्ना तप्सोनामन्नि इंचि, मनम पेनदा वेर्ते मंदकोम.

2 बारित्ते, ई आराम दोर्कना जेगाता बारेमता बेसता कबुर इस्राएल लोकलुकुंक एवताप मनकगुडा वेहमळ जर्गता. गानि ओर आ कबुरपोर्रो विस्वासम ईरा हिल्लुर, अदुनहाटी ओर्कु दानद बतले पायदा आयाहिल्ले.

3-4 विस्वासम कीतोरम मनम, आ आराम दोर्कना जेगाते तप्पाकोटा होळियंतोम. बारित्ते एडोव रोजुना बारेमते इल्हा रास्तद मंता:

“पेन अद कीता अन्नि कबाहकुनाल एडोव रोजुननाड आराम कीता,”
इंचि रासि मंता. अयना आ जेगातुन तयार कियाना कबळ, पेन दुनियातुन पुटिस्तस्केन पुरागा कीसि इर्ता. बारित्ते, विस्वासम ईस्वोरा बारेमते पेन होंगुने इल्हा इत्ता:

“ओर्कुन आराम दोर्कना जेगाते बस्केने होळिया हिय्योन,
इंचि ओट्टु तिचि वेहतन.”✧ इल्हा इत्ता.

5 आनि मर्रा, “ओर्कुन आराम दोर्कना जेगाते
बस्केने होळिया हिय्योन,”

इंचि इंकुंदि मल्का इत्ता.

6 दीनकन्ना मुन्ने मना पेद्दाल्क बेसता कबुर परकारम ताकुवाहेंका ओर आराम दोर्कना जेगाते होळिया पर्राहिल्लुर. अयना अद आराम दोर्कना जेगाते इच्चुर लोकुल्क इंदकेगुडा होळियाना मंता.

7 अदुनहाटी, पेन उंदि रोजु इंकुंदि रोज तयार कीसि इरता, अदुन “इय्याला” इंचि इंतुर. पेद्दाल्क हरि तप्ता वेल्लेन वर्साक, बल्हा अयते मुन्ने वेहताप,

“मिमेट इय्याला पेनदा पोल्ले केंजानयते,
इय्याला पेन वेहतद मोमोट केंजोम इंचेके,

इस्राएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,

अल्हा मिमेट मीवा मनसुकुने मुजोरि कियमट,”✧

इंचि दाविदना बजन संहिता पुस्तकमते पेन वेहता.

8 ओक्कला जोसुवाल ओर्कुन आराम कियाना जेगाते ओसि मत्ते इंकुंदि रोजुना बारेमते पेन मर्रा वळकाकोनवळ.

9 अदुनहाटी पेनदा लोकुल्क आराम कियाना रोजु इंका वायानदे मंता.✧

10 बल्हा अय्ते पेन दाना कबाह्कुन महाचि एडोव रोजु आराम कीता, अल्हेन दाना आराम कियाना जेगाते होळियानोरगुडा ओरा कबाह्कुन महाचि आराम कियानुर.✧

11 इस्राएल लोकल्क पेनदा पोल्ले परकारम ताकुवाहेंका ओर नासडेम आतुर, गानि मनम ओरालेसीं आयाकोंटा, पेनदा पोल्ले परकारम ताकसेके अद जेगाते होळियाना इरगा कोसिस कियागोम.✧

12 बारित्ते पेन वेहता ई पोल्ले, जीवा मत्तद आनि बलमगल्लद आंद, अद रोंडु बाजकुनाल करा-करा मनना कसेरकन्ना एक्को करा-करा मंता. अद बल्हा बोक्कानाल पूलगुन वें-वें कीता, अल्हेन आत्माताल जीवातुन वें कीता. इंका अद मनसुना विचाराल्कुन, अबुना उद्देसाल्कुना बारेमते बरोबर वेहा परता.

13 इद दुनियाते मनानव बतांगें पेनदा नदरताल मक्किसि हिल्लें. मनम मना बारेमते लेक्का अप्पजेप्पना पेनदा मुन्ने अन्निगुडा कुल्ला-कुल्ला मंतां.

येसु अंटोर्कन्ना पेद्दा पेर्मल

14 अंटोर्कन्ना पेद्दा पेर्मल, स्वर्गमते होत्ता पेनदा मरिं येसु, मनातोनि मंतोर. अदुनहाटीं अंटोरा मुन्ने ओप्कुत्ता मना विस्वासमतुन मनम गट्टिगा पीसि मंदकोम.

15 मना पेद्दा पेर्मल येसुंकगुडा मनालेसीं पापम कियाना अन्नि परिकसां वातां, गानि ओर बस्केने पापमते अर्ी हिल्लोर. अदुनहाटीं ओर मना कमजोरिन, दुक्काल्कुन तेल्लिचकुंतोर.

16 अय्ते वट! गट्टिगा दैरनेम कीसि मनम पेनदा दयाता राजगद्दे दगेर्क दाकोम. दीनहेंदाल मनाकु अक्सरम मत्तस्के, मना सहायमहाटीं ओना कुर्पा आनि दया दोर्कार.

5

पेद्दा पेर्माना कबाह्क

1 हरेक पेद्दा पेर्मन, लोकल्क ओरा लोप्पोटाल पेर्ीतुर. लोकल्कुना पापाल्क मापि आयानाहाटीं लोकल्कुनाहेंदाल ओर पेनदुक मोक्कुल्क हिय्यना, सेसां* वाटाना कबळ कियालय ओन निलाहंतुर.

✧ 4:10 उत्पत्ति 2:2 ✧ 4:11 2 पत्र 1:10-11 * 5:1 सेसां पर्कि, कोत्तां, जोन्नां, वंजि इवन्निन पेनदा गद्देतगा जमा कीतुर, इदुने सेसा इतुर.

2 आ पेर्मलगुडा वेल्ले तीरकुने कमजोर मंतोर, अदुनहाटीं तेळियका तप्पु कीतोर्कुन, हरिं तप्सोत्तोर्कुन ओर दयाते ह्ळा परंतोर.

3 अदुनहाटीं ओर लोकलकुना पापालक मापि आयालय मोक्कु हीताप, ओना सतता पापालकुनाहाटींगुडा मोक्कु हियापीता.✧

4 बल्हा अय्ते मोट्टा मोदाटा पेद्दा पेर्मल आयानाहाटीं पेन हारुनुन केयता, अल्हेन पेन केयवद बोरे मनकल ओनद ओरे पेद्दा पेर्माना कदरता जेगा येता परंर.

5 अल्हेन किरिस्तुगुडा ओनद ओर पेद्दा पेर्मल आया हिल्लोर. गानि बद पेन अय्ते ओन, “निमे नावा मरिंन आदिन, इय्याला ननाने नीकुन पुटिस्तन,” इंचि इत्तानो अंदे पेन ओन पेद्दा पेर्मल इंचि निल्लाता.✧

6 अल्हेन, “निमे मेलिकसेदेकुनलेह्का बस्केळताहाटीं पेद्दा पेर्मल आसि मंदकिन”✧ इंचि मरंदि जेगातेगुडा पेन ओन इत्ता.

7 येसु इद बूमिपोरें मनकना रूपमते मत्ता रोजकुने, ओन हामुरताल कापाळाना पेनबाबांक अळसि, मोत्कुंचि विनंति-पारतनां कीतोर. अस्के ओना बक्तितुन पीसि पेन ओना पारतनातुन केंजता.

8 येसु कुद्दु पेनदा मरिं आसिगुडा तिप्पल्क बोगांचेके, पोल्लेपोरें ताकमळ इत्ते बतल, करियतोर.

9 इल्हा, ओन्क बल्हा अय्ते आयाना मत्ता अल्हा पुरागा आसि, ओना पोल्लेपोरें ताकाना अंटोराहाटीं ओर, बस्केळताहाटीं मुक्ति हियानोर आतोर.

10 इल्हा पेन ओन मेलिकसेदेकुनलेह्का पेद्दा पेर्मल इंचि निलाहता.

पेनदा मनमळता बारेमता तेल्वि बेर्साहिल्ले

11 ई मेलिकसेदेकुना बारेमते वेहकोम इत्ते वेल्लेन पोल्लें मंतां. गानि मिहगा केंजना मनसु हिलुवाहेंका, बेस तेळियागोटिस वेहमळ इत्ते वेल्लेन कस्टम.

12 अल्हा ह्ळते इदवेरदाका मिमेट गुस्लक आया मत्ता. गानि इंदके मीके वेंरे बोरन्ना वासि पेन हिय्यना मुक्ति बारेमता पोल्लें मर्रा कराहना अब्सरम मंता. मिमेट इदवेरदाकागुडा पाल उनानोरालेसीगे मंतिट, गाटो तिननालायक आया हिल्लिट.

13 बारित्ते पाल उनना हरेक पेडल, ओर पसि पेडले मनंतोर. ओन्क नीति पोल्लेना बारेमते तेळियो.

14 गानि बोर अय्ते तेल्चि बेर्सि, मंचि-सेड्डातुन एरपाट कीसि अल्हा ताकतुरो, ओरि गाटो तिनानोरालेसी आतुर.

6

1 अस्के किरिस्तुना बारेमते सुस्वने करियता बोदाना बारेमते मर्रा-मर्रा वळ्ळमळ होळसिसि, गिचचो मुन्नेळ्ळ होंचि पेद्दा बेर्सितोरालेक्कते दाकोम. मरुंदि मल्का हामुरतेके ओयाना कबाह्कुनाल मनसु मार्सकुन्मळ, पेनदापोरों विस्वासम इरमळ,

2 बापतिस्माता बारेमते करियमळ, तल्लापोरों कय इरमळ, हासि मर्रा जीवाते तेदमळ आनि बस्केळ्ताहाटीं मनना न्यायम बारेमते करियमळ, इसोंटा किरिस्तुना बारेमते सुस्वने करियता बोदाना बारेमते मीकु मर्रा-मर्रा वेहाना अक्सरम हिल्ले.

3 अयना पेनदा इच्चा मत्ते इल्हागुडा कीकोम.

विस्वासमताल पजोळ्ळ आतोरा गति

4 बोर अय्ते पेनदुन विस्वासम कीसि पजा आ विस्वासमताल पजोळ्ळ आंतुर, ओर्कुन मनम बल्हा मर्रा मलाहकोम? बारित्ते ओर्क अय्ते ओरा पिस्वरते उंदि मल्का वेल्गु दोर्किस मत्ता,

5 ओर अय्ते स्वर्गमताल दोर्कना वराल्कुना रुसि हळतुर, पवित्र आत्माते पालिगाह्क आतुर, इंका पेनदा बेस पोल्लेनद आनि वायना कालमता ताकतता रुसि हळतुर,

6 असंटोर पेनदा मर्रिन मर्रा अंटोरा मुन्ने कृसनपोरों वेलाड वाटसि ओन बदनाम कीसंतुर. अदुनहाटीं असंटोर्कुन पेनदा विस्वासमताल लक्कु आयानय्ते मर्रा मनसु मार्सकुननालायक कियमळ असल कुदरेन कुदरो.

7 विस्वासमताल पजोळ्ळ होल्ता ई लोकुल्क, कराब बूमितसंटोर आंतुर. बारित्ते, बूमि दानपोरों अरता पिरदा एतुनंता उंचि, दान ऊळाना कास्तकरि मनकंक बेस पंटा हियानय्ते पेन दान्क आसिर्वाद हींता.

8 गानि अंदे बूमि ओक्कला हाह्कु, हाह्कुना पोदां पुट्टिचानय्ते अद कबळ्ळ ओज्जाकोंटा आसि पेनदा सापनेमलायक आंता. आकिरते दान बोळसि पोहमळ जर्गता.

पेन बस्केने मति मर्गो

9 अयते नावा पावरमगल्लोरिता, मोमोट इंदके इल्हा वळ्ळसंतोम. अयना मीहेंदाल मोमोट इवुंकन्ना बेस पोल्लें आसे पडसंतोम. मिमेट कियाना कबाह्कुन हळसि, मीकु निजमे मुक्ति दोर्कता इंचि माकु बरोसा मंता.

10 बारिल्ले, पेन अन्यायम कियानद आयो. दाना पोरोलते मिमेट कियाना बेस कबाह्कुन, दाना पवित्र लोकल्लुकुनपोर्रो मिमेट हुपिस्ता पावरमतुन आनि कीसेके मनना सहायमतुन अद बस्केने मति मर्गो.

11 मनम बदुनाहाटीं अयते आसे पळसि एदुर हळसेक मंतोमो अद दोर्कनदाका, मी लोप्पोटा हरेक मनकल पुरागा गट्टि आसेते आकिरदाका कोसिस कीसेके मनना इंचि मोमोट मनसुनाल कोरसंतोम.

12 अदुनहाटीं मिमेट लंडोर्क आयमत. गानि बोर लोकल्लुक अयते विस्वासम आनि ओप्केहेंदाल पेन हीतन इत्तादुन दक्किचकुंतुरो ओरा अळगुने अळगु वाटसि मिमेट ताकट इंचि कोरसंतोम.

पेन हीता पोल्ले

13 पेन अब्राहामुंक पोल्ले हीतस्के, ओट्टु तिनानाहाटीं दानकन्ना पेद्दोड बोर हिलुवाहेंका अद दाना सतता ओट्टु तित्ता.

14 तिचि, “नना नीकु तप्पाकोटा आसिर्वाद हीतन, इंका नीवा वंसंमतुन वेल्लेन बेसीगोट्टंतन,” ☆ इंचि इत्ता.

15 इल्हा अब्राहाम वेल्ले ओप्केते एदुर हळतोर इंचि पेन ओन्क हीतन इंचि पोल्ले हीतद ओन्क दोर्कुता.

16 मनकालोर्क ओट्टु तिनानस्के, ओरकन्ना पेद्दोरद ओट्टु तितुर. ओरा हरेक जगडमता पैसला आ ओट्टु तिननाहेंदाले पक्का आंता.

17 पेन दाना पिलानतुन बस्केने मासो इत्ता संगति, अद पोल्ले हीतोर्कुंक बेस तेळियाना इंचि पेनदा इच्चा मंता. अदुनहाटीं अद अल्हा ओट्टु तिचि दाना पोल्लेता गेरांति हीता.

18 पेन हीता पोल्ले आनि ओट्टु, इव रोंडु बस्केने बदलांचो. इवुना बारेमते पेन बस्केने आबद्दम वळ्ळा पर्रो. मनम बद आसेहेके अयते होनालय पेय्सतोमो, अद आसेहेके मनम इंकिचो गट्टि दैरनेमते होनना इंचि पेन अल्हा माकु रोंडु मल्कां गेरांति हीता.

19 अद आसे इत्ते मना जीवाहाटीं उंदि कोय्याता कुसितसोंटद आंद. अद बेस गट्टिगा आनि मेसलाकोंटा पीसि मनंता. पेन मनना पवित्र जेगातगळ्क अद मनाकुन एव्सा परंता.

20 अद जेगातगा येसु मनाहाटीं मनाकन्ना मुन्नेन होळियतोर. होळियसि मेल्लिकसेदेकुना रीतिते बस्केळताहाटीं पेद्दा पेर्मल आतोर.

7

मेल्लिकसेदेक पेर्मल आंदुर

1 ई मेल्लिकसेदेक सालेम सहरता राजाल आनि अन्निकन्ना पेद्दा पेनदा पेर्मल मत्तोर. अब्राहाम वेरे राजालोरतोनि लडाइ कीसि ओर्कुन गेल्लिस, मल्लिस वायनंके मेल्लिकसेदेक ओन्क कलियसि आसिर्वाद हीतोर.

2-3 अस्के अब्राहाम लडाइते गेल्लिस तत्ता पूरा दनम-संपत्तितुन तूस कीसि, पदोव तूस मेल्लिकसेदेकुं हीतोर. मेल्लिकसेदेक इनना पोरोल्कु अर्तम, “नीतिता राजाल” इंका इब्रानि बासाते सालेम इनना पोरोल्कु “सांति” इंचि अर्तम आंद. इत्ते ओन सुकमता राजाल इंचिगुडा इनावच्चु. मेल्लिकसेदेकुना तल्लुर-बाबो बोर आंदुर, ओना तम्मूहक-तादालोर बोर आंदुर, ओना पुटकु-हामुरता बारेमतेगुडा दर्मसास्त्रमते बतले रासि हिल्ले. पेनदा मर्रिनलेहका ओरगुडा बस्केळताहाटीं पेर्मल आसि मनंतोर.

4 ई मेल्लिकसेदेक इत्ते बच्चोन पेद्दा मनकालो मनमे विचारम कियाना मंता. मना मोदोलता मनकल अब्राहाम पगातोरहेंदाल गेल्लसता बेसता मालुना पदिताल उंदि तूस ओन्क हीतोर.

5 मूसाना नियमते उंदि आदेस मंता. अद बतल इत्ते, लेवि वंसंमताल पेर्मांलोर आतुर, वेरे वंसंमता लोकुल्क ओर अब्राहामुना वंसंमतोर आयिना ओरा तम्मूहक-तादालोर, ओरा कमयता पदिताल उंदि तूस पेर्मल आतोरकुं हिंय्युडे गाबाले.*☆

6 गानि मेल्लिकसेदेक लेविना वंसंमतोर आयोर. अय्नागानि मेल्लिकसेदेक, बोन्क अय्ते पेन पोल्ले हीसि मत्ता आ अब्राहामुनाहेंदाल पदि तूसकुनाल उंदि तूस येतकुंचि ओन्क आसिर्वाद हीतोर.†☆ दीनहेंदाल मेल्लिकसेदेक पेद्दोड आंदुर.

* 7:5 लेविना बाबो याकोब आंदुर. ओनागटाले इस्राएलतोर अंतोर पुटतुर. अब्राहाम याकोबना मातिर दादाल आंदुर. ☆ 7:5 गिनति 18:21-28 † 7:6 मेल्लिकसेदेकुना कालमते लेवि पुट्टा हिल्लोर.

☆ 7:6 उत्पत्ति 14:19-20

7 इंदके पेद्दोड सिन्नोक आसिर्वाद हीतोर इत्ता पोल्लेपोर्रो बतले अनमानम हिल्ले.‡

8 लेविना वंसमताल पेर्मांलोर आतोर पदिताल उंदि तूस येतंतुर. गानि ओर अय्ते उंदि रोज हायना मनकालोरे आंदुर. गानि बस्केळ्ळक पिस्सि मनना मेल्किसेदेकगुडा पदिताल उंदि तूस येतंतोर इंचि गवाइ वेहताप दर्मसास्त्रमते रासि मंता.

9 अल्हा हळते, पदिताल उंदि तूस येताना लेविगुडा अब्राहामुनाहेंदाल, पदिताल उंदि तूस मेल्किसेदेकुंक हीतोर इंचि इनावच्चु.

10 अद बल्हा इत्ते, अब्राहाम मेल्किसेदेकुंक कलियसि पदोव तूस हीतस्के, लेवि पुट्टा हिल्लोर, अय्नागानि ओर ओना तादो-बाबो अब्राहामुना मेंदुल्ले जीवा पेळेतालेसीं मत्तोर. ☆

येसु मेल्किसेदेकुनसोंटा पेर्मले

11 मूसाना नियमते, लेविना वंसमतोरे पेर्मांलोर्क आयाना इंचि रासतद मंता. अय्ते ओर कियाना कबाहकुनहेंदाल लोकल्क पुरागा नीतिमंतुल्क आया पर्सि मत्ते, हास्ननसोंटोन वरोन पेर्म पेन लोहचि मनवळ. गानि मेल्किसेदेकुना रीतिते वरोर पेर्मांना अवसरम बतल मत्ता?

12 बारित्ते पेर्मांना कबळ मारियतस्के, मूसाना नियमगुडा मारिया पीता.

13 इवन्नि पोल्लें इंदके वेरे कानदानते पुट्टा येसुना बारेमते वेहासेक मंतां. ई कानदानते पुट्टोर बोरेगुडा मोक्कु हिय्यना जेगातगा सेवा किया हिल्लुर.

14 मना सामि यहुदाना वंसमते पुट्टोर. ई कानदानतोर पेर्मांलोर आयाना बारेमते मूसाल बग्गेन बतल रासा हिल्लोर, इंचि अंटोर्क तेळियसे मंता.☆

15 गानि मेल्किसेदेकुनसोंटोर इंकावरोर पेर्मल वांतोर इत्तस्के, इद पोल्ले इंकिच्चो किलियर आंता.

16 उंदि कानदानतोर पेर्मांलोर आयाना, इंचि मूसाना नियमते रासतद मंता. गानि येसु आ हिंसाबते पेर्मल आया हिल्लोर. ओनगा बस्केळ्ळक पिस्सि मनना बलम मंता, अदे बलमते ओर पेर्मल आतोर.

17 बारित्ते, “मेल्किसेदेकुना रीतिते निमे बस्केळ्ळाहाटीं पेर्मल आसि मंदकिन,” इंचि ओना बारेमते दर्मसास्त्रमते रासतद मंता.

18-19 इल्हा, मूसाना नियमते रासि मत्ता आदेसाल्क लोकल्कुन नीतिमंतुल्क किया परांहिल्ले. अद नियम कमजोर आसि बताके ओज्जाकोंटा आता इंचि, पेन

‡ 7:7 मेल्किसेदेक वय्स्ने अब्राहामुंकन्ना पेद्दोड आंदुर.

☆ 7:10 उत्पत्ति 14:18-20

☆ 7:14 उत्पत्ति 29:34-35

दान पक्काक इरता. दाना जेगाते, पेन दानकन्ना मंचि आसेतुन इरता. इद आसेतुन पीसि मनम पेनदा दगेर्क होना परीतोम.

20-21 इंकुंदि पोल्ले बतल इत्ते, हारूनना कानदानतोर ओट्टु तिनाकोटेन पेर्मालोर आतुर. गानि येसु पेर्मल आयानेके पेन ओन इल्हा इत्ता: “निमे बस्केळताहाटीं पेर्मल आसि मंदकिन इंचि पेन ओट्टु तित्ता, अद दाना पोल्लेतुन बस्केने मासो,” इंचि रासतद मंता. इल्हा पेन ओट्टु तित्ताहाटीं येसु पेर्मल आतोर.

22 अदुनहाटीं इंदके पेनदा मुन्नेटा पडाना करारकन्ना, पूना करार बच्चोनो बेसतद इंचि येसु गेरांति आसि निल्लोर.

23 इंकुंदि पोल्ले बतल इत्ते, वेल्लेटोर लोकुल्क पेर्मालोर आसि मत्तुर, गानि हामुर ओर्कु हमेसाताहाटीं पेर्मल आसि मनालय अड्डम आता.

24 गानि येसुंक बस्केने हामुर हिल्ले, इंचि ओना पेर्मलतनम बस्केळताहाटीं मनंता.

25 अदुनहाटीं येसु, ओनाहेंदाल बोर अय्ते पेनदागा वांतुरो, ओराहाटीं विनंति कियालय ओर बस्केळक जीवातेन मनंतोर. इल्हा येसु माकुन पुरागा पिसागोटा परीतोर.

26 येसु पवित्र मत्तोर, ओनगा बतले कसूर मनाहिल्ले, ओन्क बस्केने पापम अंटा हिल्ले, पापिल्कुनाल लक्कु मत्तोर. अदुनहाटीं ओन स्वर्गमकन्ना एत्तु तेहामळ जर्गता. इसोँटा पेद्दा पेर्मले मनाहाटीं बेस कुदरंतोर.

27 वेरे पेद्दा पेर्मालोर मुन्नेन सतता पापाल्क मापि आयगोम इंचि मोक्कु हीकुंतुर आनि पज्जोटाल वेरे लोकुल्कुना पापाल्क मापि आयालय मोक्कुल्क हींतुर. इल्हा ओर दिन्नम कियुंदुर. गानि किरिस्तु लोकुल्कुना पापाल्क मापि आयानाहाटीं उंदे मल्का ओना मेंदुल्लुन मोक्कु हीतोर. अदुनहाटीं ओन्क वेरे पेर्मालोरलेसीं कियाना अवसरम हिल्ले.

28 मूसाना नियम कमजोर मनकालोर्कुन पेद्दा पेर्मालोर इंचि निलाहंता. गानि मूसाना नियमकन्ना पज्जोटाल, ओट्टुनतोनि वाता आ पोल्ले, पेनदा मर्रिन पेद्दा पेर्मल इंचि निल्लाता. आ मर्रि अन्नि तीरकुने पुरागा मंतोर. ओर बस्केळताहाटीं पेद्दा पेर्मल आसि मंतोर.

8

येसु मना पेद्दा पेर्मल आंदुर

1 इदवेरदाका वेहासेक वाता पोल्लेता मेन पोल्ले बतल इत्ते, स्वर्गमते अन्निकन्ना पेद्दा पेनदा तिना बाजुंक राज्येम कियालय बोर अये उद्दिदिस मंतोरो, ओरे मावाहाटी पेद्दा पेर्मल आतोर.✧

2 कुद्दु पेने निल्हाता अन्निकन्ना पवित्र जेगा आनि निजम डेराते येसु सेवक आसि पेनदा सेवा कीसेके मंतोर.

3 हरेक पेद्दा पेर्माना कबळ अये पेनदुक मोक्कु हियमळ, दानम वाटमळ आंद. अल्हेने मावा पेद्दा पेर्मल येसुनगागुडा मोक्कु हियालय बतलन्ना मनमळ अक्सरम मंता.

4 मूसाना नियम परकारम दानम वाटानोर बूमिपोर्री वेल्लेन पेर्मालोर मंतुर. अदुनहाटी येसु बूमिपोर्री मंचि मत्ते, पेर्मलगुडा आयाकोन्नेर.

5 पेनदा डेरा निल्हाका मुन्ने, “निमे गुट्टापोर्री नावातोनि मत्तस्के नना नीकु बद नक्से हूपिस्तनो, बरोबर अल्हेने नाहाटी डेरा निल्हा,” इंचि पेन मूसांक वेहचि मत्ता. दीना अर्तम बतल इत्ते, पोर्री स्वर्गमते मंदना पेनदा डेराता नीडालेसीगे, इद बूमिते पेर्मालोर सेवा कियाना जेगा मनंता.✧

6 गानि इंदके पेनदा पूना करारते माकुन कल्पानोर येसे आंदुर. इद करार, मुन्नेटा पडाना करारकन्ना बच्चोनो बेस मंता. अद बल्हा इत्ते, पूना करारते पेन वेहता पोल्लें, मुन्नेटा पडाना करारते मत्ता पोल्लेंकन्ना बच्चोनो बेस मंतां, इल्हा इद बूमिते मनना पेर्मालोर्कन्ना येसुंक वेल्ले बेस सेवा दोर्कता.

7 ओक्कला पडाना करारते बतले दोसेम हिलाकॉटा मंचि मत्ते, पूना करारता अक्सरमे अर्काकोनवड.

8 गानि पेन दाना लोकुल्कुनगा दोसेल्क दिसतस्के ओर्कुन इल्हा इत्ता:

“हुळाट, नना इस्राएल राज्येमतोनि आनि यहुदिया राज्येमतोनि,

पूना करार कियाना रोजकु वासेकेन मंतां.

9 नना ओरा तादो-बाबुर्कुन कय पीसि इजिप्त देसेमताल पलाते तच्चि मत्तन.

अस्के ओरतोनि कीता करारलेहका इद पूना करार मन्यो.

नना ओरतोनि कीता करार परकारम ओर ताका हिल्लुर,

अदुनहाटी नना ओर्कुन लेक्का किय्योन.

10 गानि अव रोजकु दाटसोत्ता पजा,

नना इस्राएल लोकुल्कुनतोनि कियाना पूना करार इल्हा मनंता.

नना नावा नियमकुन ओरा मनसुल्कुने रासि, अवुन ओरा बुद्दिदेते इरानालायक कीतन,
नना ओरा पेनदुन आकन, ओर नावा लोकुल्क आयानुर.

11 अद वेलाते सिन्नाल्क-पेद्दाल्क अंटोरे नाकुन एरपाट कीसि मनांतुर,
अदुनहाटी, पेनदुन एरपाट कीम्टु, इचि लोता पक्कातोरक आयि जीवातोरक आयि,
ओर-ओरा नाटेनोर्क वेहना अब्सरम हिल्ले.

12 बारित्ते, ओर कियाना तप्पुड कबाहकुन नना दयाते मापि कीकन,
ओरा पापालकुन मर्रा बस्केने मति किय्योन,”✧
इचि रासतद मंता.

13 इदुन पेन “पूना करार” इत्ताहाटी मोदाटा करार कबळ्ळ ओज्जाकोंटा आसि पडानद आसोल्ता. अद इंदके बिराने दिसाकोंटा आयार.

9

बूमिपोर्रोटा आरादना आनि स्वर्गमता आरादना

1 इस्राएल लोकुल्कुतोनि कीता मोदाटा करारते, पेनदुन मोळ्ळकाना बारेमते नियमकु रासतव मत्तां. आ नियम परकारम मोळ्ळकानाहाटी इद बूमिमे उंदि डेरा मत्ता.*

2 अद डेरा इल्हा मत्ता. आ डेराता मुन्नेटा अरति पोतसेके मनना पतें इरालिय उंदि दीसोडि आनि उपारमता हारि इरालिय उंदि टेबल मनुंदु. अद अर्रातुन पवित्र जेगा इंतुर.

3 दीना पज्जो इंकुंदि परदा मत्ता, अद परदाता पज्जोटा अर्रातुन अन्नितकन्ना पवित्र जेगा इंतुर.

4 अद अरति गुगलेम वाटनाहाटी बंगारमतोनि तयार कीतद उंदि दूपम कुळका† आनि करारकुना संदगु मत्ता..✧ आ करारकुना संदगु पुरागा पिच्चर बंगारमता पालिस हीसि मत्ता. आ संदगुने उंदि बंगारमता बुड्डिड मत्ता, अवटे ‘मन्ना’ इरसि

✧ 8:12 यिर्मयाह 31:31-34 * 9:1 अद डेरा मूसाना कालमते तयार कीतद आंद. † 9:4 दूपम कुळका इद वेल्लेन पेद्देद मत्ता. दूपम अय्ते पोर्रोटा बाजुने वाटुंदुर, गानि लोप्पोगुडा सामान इरालिय जेगा मनुंदु. ✧ 9:4 निर्गमन 30:1-8

मत्ता☆ इका आ संदगुने हास्नना दुड्डु मत्ता, अदुंक इग्गुर वासि मत्ता.☆ इका अवे पेनदा करार्क रासि मत्ता बंडाता बल्लांगुडा मत्तां.☆

5 आ संदगुना मूताता पोर्रोटा बाजुन “पापाल्क मापि कियाना जेगा” इतुर. महिमाता वेल्गुने निडिसि मत्ता रौंडु कस्बः इनानवुना बोम्मां आ जेगापोर्रो नीडा कीसि कावेल कीसिके मनुंदु. इव अन्निटवुना बारेमते तेल्लिचि वेहालय इंदके वेला हिल्ले.

6 इल्हा इवन्नि तयार कीता पजा, डेरालोप्पो मोळकाना जेगातगा पेर्मालोर होचि रोज सेवा कीसिके मनुंदुर.

7 गानि इंकुंदि परदाता पज्जोटा अरति, सिराप पेद्दा पेर्मल ओना सतता पापाल्कुनाहाटीं आनि लोकुल्क तेळियका कीता पापाल्कुनाहाटीं मोक्कु हियालय नेत्तुर पीसि, वर्साक उंदि मल्के दांतोर.

8 इवुनंता हळसि बतल अर्तम आंता इत्ते, बदवेरदाका अये इसोटा मोदाटा डेरा मनंतनो, अदवेरदाका अन्निटकन्ना पवित्र जेगाते होनालय हरि कुल्ला हिल्ले, इचि पवित्र आत्मा वेहांता.

9 ई डेरा इत्ते, इंदकेटा कालमते जर्गनदुना बारेमता उंदि चिन्ह आंद. अगा हियना मोक्कुल्क, दानम वाटमळ इवंता मनकाना मनसुन पुरागा समादानम किय्यो.

10 अद बल्हा इत्ते, तिनुळ-उनुळ कियाना मोक्कुल्क, पवित्र आयाना कबाहक इव नियमकु सिराप पलाताल पवित्र आयानाहाटीं कबळ्ळ ओज्जंतां. गानि पेनदा पूना करार वातस्के इव बवे बतले कबळ्ळ ओज्जो.

येसुए कुदुदु मोक्कु आयमळ

11 गानि किरिस्तु पेद्दा पेर्मल आसि, माहाटीं बेसता पोल्ले पीसि वातोर. ओर इंदके स्वर्गमते मनना अन्निटवुंकन्ना पेद्दोड आनि अन्नि तीरकुने पुरागा मनना डेरातगा सेवा कियालय होळियतोर. अद मनकानाहेंदाल कीतद आयो, इत्ते अद दुनियातद आयो.

12 ओर अगा एटिना नेत्तुरो, पेय्याना नेत्तुरो पीसि होळिया हिल्लोर. गानि ओना सतता नेत्तुरतुन पोंगागोटसि, उंदे मल्का आ अन्निटकन्ना पवित्र जेगातगा

☆ 9:4 निर्गमन 16:33-34 ☆ 9:4 गिनति 17:8-10 ☆ 9:4 निर्गमन 34:28 ‡ 9:5 रौंडु कस्ब इवुन इब्रानि बासाते कस्बीम इतुर. अवगुडा उंदि तीरता दूतांगे. पेन पापाल्कुन मापि कियाना जेगा ई संदगुना पोर्रोटा बाजुनेन मंता. अद बंगारमते मेत्तिसि मंता. पेर्मल पापाल्कुनाहाटीं मोक्कु हीतस्के, नेत्तुरतुन अग्गेन पोंगागोटतोर. अस्के अदुन हळसि पेन लोकुल्कुना पापाल्क मापि कीता.

होळियतोर. अदुनहेंदाल मनम अन्नि पापाल्कुनाल बस्केळताहाटीं मुक्तिंतुन दोर्किचकुत्तोम.

13 मूसाना नियम परकारम, एटिं, कोंदाना नेत्तुर, कमरिस्ता पेय्याता बूळ्दि, मुट्टुने मत्तोरपोर्नी सल्लानय्ते अव सिराप ओरा मेंदुल्लुन पलाताले पवित्र कीतां.

14 गानि किरिस्तुना नेत्तुर, हामुरताहेके ओयाना कबाहक कियाना मना मनसुन अवुंकन्ना बच्चोर सुद्द किय्यार! अद बल्हा इत्ते, बस्केळक मनना पेनदा पवित्र आत्माता बलमतोनि, बतले दोसेम हिल्लुवा येसु, पेनदा मुन्ने सतागा मोक्कु आतोर. बस्केळक जीवाते मंदना पेनदुन मनम मोळ्ळकाना इंचि येसु अल्हा कीतोर.

15 पडाना करारते मत्ता नियमकुन पीसि ताकुवाहेंका अस्केटा लोकल्क पापम कीसि अद करारतुन नेम्हातुर. ओर्कुन ओरा पापाल्कुना सिक्साताल तप्सानाहाटीं किरिस्तु हासोत्तोर. इल्हा पेन अद केयता लोकल्कून पूना करारते कल्पंता. अद केय्पि मत्तोर्कुंक, दाना बस्केळक मनना वारसान हक्कुन हीतन इंचि केय्पि पोल्ले हीतानो, ओर्क अद दोर्कता. इल्हा किरिस्तु ई पूना करारते नड्डुमतोर आतोर.

16-17 वरोर मनकल ओना बूमि-जेगां बोन्क आयाना इंचि रासंतोर, ओर हातास्केन ओर रासि इरता कायदोम सेल्लांता. ओर पिस्सि मत्ताचुं रोजकु अद कायदोम सेल्लो. पेनदा करारगुडा इल्हे मंता.

18 इंचे मरि, मोदाटा करारगुडा नेत्तुर पोंगागोट्टुवा निल्ला पराहिल्ले.

19 अदुनहाटीं मूसालगुडा दर्मसास्त्रमते रासि मत्ता अन्नि आदेसकुन अंतोर लोकल्कुंक वेहतोर अस्के, कुर्रा-एटिना नेत्तुरतुन येते कल्पिसि, जूपा इनना पोर्काताऽ कोम्माक गोर्रता एर्ना बूरा हुट्सि, दर्मसास्त्रमता पुस्तकाल्कुनपोर्नी आनि अंतोर लोकल्कुनपोर्नी सल्लोर.

20 पजा, “पेन मीकुन बद आदेसकुना परकारम ताकट, इंचि वेहतानो, ई नेत्तुर अदे करारतद आंद,” इंचि वेहतोर.✧

21 अल्हेने, मोळ्ळकाना डेरापोर्नी आनि मोळ्ळकानेके वाळ्ळकुनना अन्नि वस्तुकुन पोर्नीगुडा मूसाल आ नेत्तुरतुन सल्लोर.

22 मूसाना नियम परकारम हळते, दग्गेर-दग्गेरा अन्निगुडा नेत्तुर सल्लिसे सुद्द कियमळ गावाले. नेत्तुर पोंगागोट्टाकोटा पापाल्कुंक मापि हिल्ले.✧

येसुना हामुरताहेंदाल पापाल्क मापि आंतां

§ 9:19 जूपा इनना पोर्काई जूपा मरा तुलसे मरालेह्का मंता.

✧ 9:20 निर्गमन 24:7-8

✧ 9:22 लैव्यवस्ता 17:11

23 अदुनहाटीं स्वर्गमते मनना वस्तुकुनालेसीं दिस्सानव मनकालोर तथार कीता ई नकलि वस्तुकुन, जिवरासिना मोक्कु हीसि पवित्र कियाना अवसरम अरता. गानि स्वर्गमते मनना वस्तुकुन पवित्र कियागोम इत्ते, ई जिवरासिना नेत्तुरकन्ना इका बच्चोनो बेसता मोक्कुल्क हियापीता.

24 बूमिपोर्री मनकालोर कीता अन्निटकन्ना पवित्र जेगा इत्ते, स्वर्गमते मनना निजम पवित्र जेगातसोंटा उंदि पोटवे आंद. बारित्ते, मनकालोर कीता पवित्र जेगाते किरिस्तु होळिया हिल्लोर, गानि इंदके ओर मना अंटोराहाटीं सीदा स्वर्गमते होळियसि पेनदा मुन्ने विनंति कियालय निल्सि मंतोर.

25 अचोने आयका, एटा-एटा पेद्दा पेर्मल मोक्कु हियालय सतता नेत्तुर आयो गानि जिवरासिना नेत्तुर पीसि बूमिपोर्रीटा अन्निटकन्ना पवित्र जेगाते होळियंतोर. अल्हा ऊके-ऊके सतता मोक्कु हियालय किरिस्तु स्वर्गमते होना हिल्लोर.

26 ओक्कला अल्हा ऊके-ऊके मोक्कु हियमळगिंटा आसि मत्ते, दुनिया पुट्टस्केटाल इदवेरदाका बच्चुंगो मल्कां किरिस्तुंक ओना जीवा हिय्या पियवड. गानि इद युगमता आकिरते, किरिस्तु सतता मोक्कु हीसि, पापमतुन नासडेम कियानाहाटीं उंदे मल्का वातोर.

27 बल्हा लोकुल्क अंटोर उंदि मल्का हासि दांतुर, पजा पेन ओरा न्यायम कीता, इंचि मुन्नेन निरनायम कीसि मंता,

28 अल्हेन किरिस्तु, वेल्लेटोरा पापालकुन नासडेम कियानाहाटीं उंदे मल्का ओना सतता जीवातुन मोक्कु हीतोर. ओर मसदि मल्का मल्सि वायना मंतोर. अय्ते ई मल्का ओर पापमतुन नासडेम कियालय आयो, गानि ओनाहाटीं बच्चोनो ओप्केते बस्के वांतोर इंचेके एदुर हळसेक मनानोर्कुन पिसागोटनाहाटीं वायानुर.

10

1 मूसाना नियम अय्ते, मुन्ने बव बेस पोल्ले जर्गानव मंतांगो, अवुना सिराप नीडे आंद, निजम रूपम आयो. अदुनहाटीं एटा-एटा पेर्मल्लोर, आगाकौंटा हिय्यना उंदे तीरकुना मोक्कुल्क, पेनदा दग्गेर्क होनानोर्कुन पापमताल पुरागा पवित्र किया पर्री.

2 ओक्कला अल्हा आसि मत्ते, बक्तुल्कुना मनसुल्कुने, “मोमोट पापिर्क” इत्ता विचारम वायाकोनवळ आनि ओर सुद्द आसि मत्ताहाटीं मोक्कुल्क हियमळ आपिसि मन्नेर. 3-4 गानि एटिना नेत्तुर आयि, कौंदाना नेत्तुर आयि, पापालकुन बस्केने लक्कु किया पर्री. बारित्ते एटा-एटा ओर हिय्यना मोक्कुल्क, ओर्क ओरा पापालकुन मति कीसि हीसेकेन मंतां.

किरिस्तु मनाकुन पवित्र किया परंतोर

5 अदुनहाटीगे, किरिस्तु इद दुनियाते वातस्के पेनतोनि इल्हा इत्तोर:

“निमे मोक्कुल्क आयि, दानाल्क आयिं कोराहिल्लिन,
गानि नाहाटीं उंदि मेंदुल तयार कीतिन.

6 कमुरबोलि आयिं, पापम मापि आयानाहाटीं हीता मोक्कुल्क आयिं,
नीकुन कूस किय्यों.”

7 अस्के किरिस्तु,

“पेनदुना! दर्मसास्त्रमते नावा बारेमते रासि मत्ता परकारम,

नीवा इच्चातुन पुरागा कियालय नना वातन.”☆

इंचि इत्तोर.

8 पोर्गे वेहताप, “मोक्कुल्क, दानाल्क, कमुरबोलिं आनि पापम मापि आयानाहाटीं हिय्यना मोक्कुल्क इवन्निगुडा निमे कोराहिल्लिन इव नीकुन कूस किय्यों,” इंचि पेनतोनि वेहतोर.

9-10 अल्हा वेहचि, “पेनदुना ह्ळा! नीवा इच्चातुन पुरागा कियालय नना वातन,” इंचि इत्तोर. पेनदा इच्चातुन पुरागा कियानाहाटीं येसु किरिस्तु ओना सतता मेंदुलतुन उंदे मल्का मोक्कु हीतोर. हीसि रोंडो करारतुन सुस्व कियानाहाटीं, मोदाटा करारतुन बंद कीतोर. इल्हा पेन मनाकुन पवित्र कीता.

11 मोदाटा करार परकारम, हरेक पेर्मल सेवाताहाटीं ओन्क रोजु गद्दे मुन्ने निल्ले पीता आनि हीता मोक्कुल्के ऊके-ऊके हियापीता. गानि अव मोक्कुल्क मात्रम बस्केने पापालकुन लक्कु किया परीं

12 गानि किरिस्तु अय्ते मना पापालकुन लक्कु कियालय, हमेसाताहाटीं उंदे मल्का ओना मेंदुलतुन मोक्कु हीतोर. हीसि पेनदा तिना बाजुंक होंचि उद्दिदसि मंतोर.

13 इल्हा अस्केटाल, किरिस्तु ओना पगातोर्कुन पेन ओना काल्क इराना कुत्तुललेसी बस्के कीता इंचेके एदुर ह्ळसेक मंतोर.☆

14 बारित्ते, पवित्र आयानाहाटीं पेन वेरे कीता मनासंतोर्कुन, ओर सिराप उंदे मल्का मोक्कु आसि, हमेसाताहाटीं अन्नि तीरकुने पुरागा कीतोर.

15-16 इदुना बारेमते इल्हा रासतद मंता:

“अव रोजकु दाटसि होत्ता पजा,

नना इस्राएल लोकलुकुनतोनि कियाना पूना करार इल्हा मनंता.
अद बतल इत्ते, नना नावा नियमकुन ओरा गुंडेने रासि, अवुन ओरा मनसुलुकुने
वाटंतन,”

इंचि पेन वेहता. इल्हा पवित्र आत्मागुडा मनाकु दर्मसास्त्रमते गवाइ वेहता.✧

17 अचोने आयाका,

“ओरा पापालुकुन आनि ओर कीता तप्पु कबाह्कुन मर्रा बस्केने मति किय्योन,”✧
इल्हागुडा पवित्र आत्मा वेहता.

18 पेन मावा अग्नि पापालुकुन मापि कीता अय्ते, इंका मर्रा अवुनाहाटीं मोक्कुलुक
हिय्यना अवसरमे हिल्ले.

दैरनेमते पेनदा दग्गेर्क दाकोम

19 अय्ते विस्वासुलुकुनिटा, येसु मनाहाटीं ओना नेत्तुरतुन पोंगागोटतोर.
अदुनहाटीं मनाकु इंंदके आ पूनद, जीवाते मनना हरिं पीसि पवित्र जेगाते होनना
दैरनेम वाता.

20 येसु ओना मेंदुलताहेंदाल परदातुन पक्काक कीताहाटीं, मनम पेनदागा
विस्वासमते होना परतौम.

21 अचोने आयाका, येसे मना पेद्दा पेर्मल आंदुर, ओर पेनदा लोकलुकुनपोरों
अदिकारि आंदुर.

22 अदुनहाटीं मनम सत्तेम मनसुने, पुरागा विस्वासमते, इंका मना विवेकमतुन
दोसेम हिलाकोंटा कियानाहाटीं मना मनसुनपोरों किरिस्तुना नेत्तुर सल्सि, इंका
मेंदुलतुन बेस साप एते नोर्सि पेनदा दग्गेर्क दाकोम.✧

23 मनाकु बद पेन अय्ते पोल्ले हीतानो अद विस्वासमगल्लद आंद. अदुनहाटीं
मनम वैरेंतोरा मुन्ने ओप्कुत्ता आसेताल पजोळ्ळक आयाकोंटा, गट्टि दैरनेमते
मंदकोम.

24 मनम वरोंक वरोर पावरम कियालय, बेसता कबाह्क कियालय आनि बतल-
बल्हा कीते बेस इंचि वरोंक-वरोर दैरनेम हियालय विचारम कीकोम.

25 आरादनाहाटीं उंदगा जमा आयाना जेगाते वायाकोंटा मनमळ इच्चुर्कु
अलवट आसि मंता. गानि मनम ओरलेह्का मनामग्नि. मुक्केमाता पोल्ले बतल
इत्ते, येसु सामि मरंदि मल्का वायाना रोजु दग्गेर्क वासंता, अदुनहाटीं मनम अंतोरम

उंदासि, वरोंक-वरोर दैरनेम हीसेक मुन्ने अरकोम इंचि इंकिच्चो जिद्दिंते वेहासेक मंदना.

26 इव पोल्लें नना बारि रासेक इत्ते, सत्तेम इत्ते बतल मनाकु तेळियता. इल्हा सत्तेम तेळियसिगुडा तेळियवाप पापम कीसेके होत्ते, इव पापाल्कुनाहाटीं मात्रम इंका बद्दे मोक्कु हिल्ले.

27 गानि दाना बदुलते, बोर अय्ते पेनदा विरोदमते ताकतुरो ओराहाटीं पेन सिक्साता आदेस हीसि, ओर्कुन बरा-बरा पोत्तना तळमिंते वाट्सि बूळ्दि किय्यार इत्ता, वेरियानसोंटा पोल्लें मात्रम मिगिल्सि मंतां.☆

28 मूसाना नियमतुन विरोद कियाना मनकाना बारेमते, इव्वुर हिलाकोटे मुव्वुर गवाइदार्कुना पोल्लें केंजसि ओनापोरों दया कियाकोटेन ओन्क हामुर सिक्सा हीतुर.☆

29 अय्ते, इंदके पेनदा मर्रिन पास्काना मनकंक, बद नेत्तुरहेंदाल अय्ते पवित्र कियमळ जर्गता आ पूना करारता नेत्तुरतुन, पवित्र आयो इंचि इनना मनकंक, कुर्पा हुप्साना पेनदा आत्मातुन पास्कानोंक, बच्चोन पेद्दा सिक्सा दोर्कारो, मिमेटे विचारम कीसि हुळट.

30 बारित्ते पेन इत्ता गदा,
“बद्दला येताना कबळ नावद आंद, ननाने बद्दला येतंतन,” आनि मर्रा,

“सामि ओना लोकल्कुना न्यायम कीतोर,”☆
इंचि इत्ता. इद पोल्ले मनाकु एरपाटे मंता.

31 जीवाते मंदना पेनदा कय्दे दोर्कना सिक्सा इत्ते, इरगेन वेरियानाल मनंता.

32 मिमेट बेसता कबुर केंजसि पेनदा वेलगुन दोर्किचकुत्ता आ एनकटा रोजकुन मति कीम्टु, अव रोजकुने बच्चुंगो तकलिपकु वातां, अयना मिमेट ओर्सकुत्तिट.

33 बस्के-बस्के अय्ते अंटोरा मुन्ने मीकुन रोता-रोता पोल्लें इंचि बदनाम कियमळ जर्गता. इंका बस्के-बस्केनो अय्ते, इसोंटा तिप्पल्क बोगांचनोरा तोळने मिमेट निल्लिर.

34 अचोने आयका बेसता कबुर वेहताहाटीं जेलने अर्सि दुक्कमते मत्तोरा दुक्कमते मिमेट कलियतिर. मीवा संपत्तिंतुन दोसकुंचि ओयिना गानि मिमेट कुसिते मत्तिट. बारित्ते दोसकुंचि ओतादानकन्ना बेसतद, बस्केळ्क मनानद संपत्ति पेन मीहाटीं इरता इंचि मिमेट तेल्पिचकुत्तिर.

35 पेनदापोर्रोटा मीवा विस्वासमतुन पीसि, मीकु वेल्लेन पेद्दा इनाम मंता. अदुनहाटी बतल आयिनागानि मिमेट विस्वासमताल पजोळ्ळक होनमट.

36 मिमेट दैरनेमते सहन कियमळ अब्सरमे मंता, अल्हा मत्तेन मिमेट पेनदा इच्चातुन पुरागा किया परकिट आनि पेन मीकु बतल अय्ते हीतन इंचि पोल्ले हीतानो अद मीकु दोर्कार.

37-38 बारिल्ले,

“बोर सामि वायानोर मंतोर, ओर बिरानेन वांतोर, ओर आल्सेम किय्योर.

ओर वायनादाका, नावापोर्रो विस्वासम कीता नीतिमंतुल्क विस्वासमतेन पिस्संतुर.

गानि ओरावेटाल बोरन्ना ना पोरोटा विस्वासमताल पजोळ्ळक आते, ओन नना मेच्चुकुन्नोन्,”☆

इंचि दर्मसास्त्रमते पेनदा पोल्ले रासतद मंता.

39 गानि मनम अय्ते, विस्वासमताल पजोळ्ळक आसि, नासडेम आयानोर लेसीटोरम आयोम. विस्वासम कीताहाटी मनम पेनदाहेंदाल पिसांतोम.

11

विस्वासमते पिसतोरा बारेमते कोन्नि पोल्लें

1 विस्वासम इत्ते बतल? मनम आसे पळसि मत्तव पोल्लें मनाकु तप्पाकोंटा दोर्कानू आनि मना कळ्ळुक दिस्साकोन्नागानि अव मंतां इत्ता गेराटिए, विस्वासम आंद.

2 मना एनकटा पेद्दाल्ळुनगा इसोंटा विस्वासम मत्ता, अदुनहाटीगे पेन ओर्कुन मेच्चुत्ता.

3 विस्वासमहेंदाले, पेन इद दुनियातुन दाना पोल्लेतोने पुटिस्ता इत्ता पोल्ले, मनम तेलिचकुना परंतोम. दीना अर्तम बतल इत्ते, मनाकु इंदके दिस्सानव अन्नि पोल्लें, दिमुवा पोल्लेनाहेंदाल पेन कीता,☆ इंचि मनाकु तेळियता.

4 विस्वासमहेंदाले आदामना मरि आबेल, ओना दादाल काइनुंका बच्चोना बेसता मोक्कु पेनदुक हीतोर. काइन बतल अय्ते हीतोर अदुन पेन मेच्चुना हिल्ले गानि, आबेलना मोक्कुन पेन मेच्चुंचि ओन नीतिमंतुड इंचि गवाइ हीता. आबेल अय्ते हातोर, गानि ओना विस्वासमहेंदाल मनम इदवेरदाकागुडा करियसेक मंतोम.☆

☆ 10:37-38 हबक्कूक 2:3-4 ☆ 11:3 उत्पत्ति 1:1; योहान 1:3; बजन सहिता 33:6; 33:9 ☆ 11:4 उत्पत्ति 4:3-5; 4:10

5 विस्वासमहेंदाले हानोकुंक हामुर वायाका मुन्नेन, उंदि रोज ओर गायप आतोर. बारित्ते पेन ओन तेहाकुंचि ओता. अदुनहाटीं ओना जाळा बोनके दोर्काहिल्ले. पेन ओन स्वर्गमते ओयाका मुन्ने ओर पेनदुन कूस कीतोर इंचि ओना बारेमते दर्मसास्त्रमते रासतद मंता.*

6 विस्वासम हिल्वद पेनदुन बोरे कूस किया पर्स्. पेनदागा वायाना हरेक मनकल, पेन निजमते मंता आनि दान हट्टु पीसि पहकानोंक अद बेसता इनाम हीता इंचि विस्वासम किया पीता.

7 विस्वासमहेंदाले नोहाल, कम्मुड वायाना मंता इंचि पेन ओन्क वेंरे वेहतस्के ओर कम्मुडतुन बस्केने ह्ळा हिल्लोर गानि, पेनदा पोल्लेक कदर हीसि, कम्मुड वायाका मुन्नेन ओना कुटुंबतोरुन कापाळनाहाटीं पेद्दा डोंगा तयार कीतोर. इल्हा ओर दुनियातोर अंठोर तप्पुर इंचि ओना विस्वासमहेंदाल पेन दुनियातोरुन दोसिल्क इंचि वेहता. ओना इदे विस्वासमहेंदाल ओर, पेनदा मुन्ने नीतिमंतुल्क आतोरा लोप्पो कलियतोर.*

8 विस्वासमहेंदाले पेन अब्राहामुन, “नना नीकु हुप्साना देसेमते होन, अगाटा पूरा जेगा नीकु हीकन” इंचि इत्तस्के, बेके होनना इंचि तेळियाकोन्ना गानि तेळियवा जेगाहेके होनालय पेयसतोर.

9 विस्वासमहेंदाले अब्राहाम, पेन ओन्क हीतन इंचि पोल्ले हीता देसेमते होंचि, पराइ देसेमतोनलेसीं डेरा वाट्सि पिस्सेक मत्तोर. ओनतोनि ओना मर्रि इसाक आनि इसाकुना मर्रि याकोब, ईरगुडा अद देसेमता वारसदार्के. ओरगुडा अगा डेरां वाट्सि पराइ देसेमतोरलेसीं पिस्सेक मत्तुर.

10 बारित्ते, कुद्दु पेने सारे पीसि, पुनादि दोह्चि, बस्केळताहाटीं निल्हाता सहरते मनालय ओर विस्वासमते एदुर ह्ळसेक मत्तुर.

11 विस्वासमहेंदाले अब्राहामुंक ओना मुत्तो सारानतोनि कलियसि, मातिरतनमतेगुडा मर्रिन कनाना बलम दोर्कता. बारित्ते, ओन्क संतानम हीतन इंचि बद पेन अय्ते पोल्ले हीतानो, अद पोल्ले तप्पो इंचि ओर दानपोर्रो विस्वासम इरतोर.*

☆ 11:5 उत्पत्ति 5:22-24 ☆ 11:7 उत्पत्ति 6:13-22; 7:1 * 11:11 विस्वासमहेंदाले अब्राहामुना मुत्तो साराल, मातिरतनमतेगुडा नेला तप्पि मर्रिन कंता. बारित्ते, दान्क संतानम हीतन इंचि बद पेन अय्ते पोल्ले हीतानो, अद पोल्ले तप्पो इंचि अद विस्वासम कीता. इल्हा कोन्नि पडाना पांडु लिपिने रासि मंता. ☆ 11:11 उत्पत्ति 17:19; उत्पत्ति 21:1-2

12 अदुनहाटीं डुग-डुग मातरल आसि हासोत्तोनलेहका मत्ता वरोरे अब्राहामुंक पेन, मब्बुने मनना सुक्कनच्चोन आनि समुद्रम ओड्डुंक मनना उस्केतच्चोन, लेक्का पस्वच्चो संतानमतुन हीता.☆

13 पेनदापोर्रो विस्वासम इरतोर अंटोरगुडा दानपोर्रो विस्वासम इरसे हासोत्तुर. पेन हीतन इंचि पोल्ले हीतद ओर्कु दोर्काहिल्ले. गानि पेन हीतन इत्तादुन लक्कुटाले हळताप हळसि कूस आतुर. पजा मनम इद बूमिपोर्रो पय्नेम कीसेके वाता पराइतोरम इंचि ओप्कुत्तुर.

14 इसोटा पोल्ले बोर अय्ते वळकंतुरो, ओर ओरा सतता देसेमतुन पहकसंतुर इंचि मनाकु अर्तम आंता.

15 ओक्कला, ओर होळसि वाता देसेमता बारेमते विचारम कीसि मत्ते, ओर्क ओरा होळसि वाता देसेम मल्लि होनना मोका दोर्किसि मनवळ. गानि ओर होळसि वाता देसेमता विचारमते मना हिल्लुर.†

16 दाना बदुलते ओर, होळसि वाता देसेमकन्ना एक्को बेसता देसेम, इत्ते ओराहाटीं पेन स्वर्गमते तयार कीसि इरता देसेमते होनना विचारमते मत्तुर. अदुनहाटीं पेन, 'नना ओरा पेनदुन' इंचि इनालय सिगु अर्रो.

17 विस्वासमहेंदाले, पेन अब्राहामुना पट्टु हळतस्के, ओर ओना वरोरे मर्रि इसाकुन मोक्कु हियालय तयार आतोर. पेन हीतन इंचि मत्ता पोल्लेतुन ओर विस्वासम कीसि मत्तोर.

18 अयना, "इसाकुनाहेंदाल नीकु दोर्काना वंसंम नावा लोकुल्क आयानुर," इंचि पेन अब्राहामुंक मुन्नेन पोल्ले हीसि मत्ता. आयनागानि ई इसाकुने अब्राहाम, पेनदुक् मोक्कु हियालय तयार आसि मत्तोर.

19 बारित्ते, पेन हासोत्तेर्कुंकगुडा जीवा अरहा पर्रता, इंचि ओर विस्वासम कीतोर. हातोन जीवाते तेहाचि हीतापे, पेन अब्राहामुंक ओना मर्रिन हीतागुडा.☆

20 विस्वासमहेंदाले इसाक, ओना याकोब, एसाव इनना इव्वुर मर्कुंक, वायाना कालमते ओर्कु बल्हा जर्गार इंचि आसिर्वाद हीतोर.☆

☆ 11:12 उत्पत्ति 15:5; उत्पत्ति 22:17; उत्पत्ति 32:12 † 11:15 अब्राहाम बेबिलोन देसेमता ऊर इनना गाटे पुट्तोर. (उत्पत्ति 11:28) गानि कनान देसेमते वाता पज्जो, ओर ओना पुट्ता देसेम बस्केने तिरियसि होना हिल्लोर. इसाक, याकोब अद देसेमताल पोरिह्कुन तत्तुर गानि अद देसेम होचि अगा जेगा पिण्या हिल्लुर. ☆ 11:19 उत्पत्ति 22:1-18 ☆ 11:20 उत्पत्ति 27:27-40

21 विस्वासमहेंदाले याकोब, जीवा होळसका मुन्ने, योसेपुना इव्वुर मर्कुन वरो-वरोन केय्सि, आसिर्वाद हीतोर आनि दुड्डुना पोर्रो ऊनसि पेनदुन आरादना कीतोर.✧

22 विस्वासमहेंदाले योसेप, इस्राएल लोकुल्क इजिप्त देसेमताल पेय्सि होनानुर इंचि जीवा होळसका मुन्नेन वेहा परतोर. अचोने आयाका, अद देसेमताल पेय्सि होननेके ओना बोक्कनगुडा पीसि पेय्सना इंचि आदेस हीतोर.‡

23 विस्वासमहेंदाले, मूसाल पुट्त्स्के ओना तल्लुर-बाबो ओन मूड नेल्क मक्किच्चि इरतुर. “मावा पेडल सक्कगा मंतोर” इंचि तल्लुर-बाबो तेल्पिचकुत्तुर. अदुनहाटी “इब्रितोर्क पुटता अंतोर मांडूसा पिलालकुन हक्कट” इंचि राजाल हीता आदेसुंक ओर वेरियाकौंटा मत्तुर.✧

24 विस्वासमहेंदाले मूसाल पेद्दा बेर्सतस्के, पिरोन राजाना मिय्यटा मरिन इंचि वेहकुनालय ओप्कुना हिल्लोर.

25 दान्क बदुलते, पापमहेंदाल दोर्कना जेर्सेपाटा सुकमते पिस्सनदानकन्ना, पेनदा लोकुल्कुनतोनि कलियसि तिप्पल्क बोगांच्मळे बेस इन्कुत्तोर.

26 पेनदाहेंदाल दोर्कना इनामुनाहाटी ओर उंदितीर एदुर हळसेक मत्तोर. अदुनहाटी ओर इजिप्त देसेमता दनम-संपत्तिकन्ना, किरिस्तुनाहाटी अपमानम सहन कियमळतुने पेद्दा दनम इन्कुत्तोर.

27 विस्वासमहेंदाले, इजिप्त देसेमता राजाल होंगुंक वायिनागानि, वेरियाकौंटा मूसाल इजिप्त देसेम होळसीतोर. बोर्के दिसुवा पेन ओन्क दिसताप, ओर गट्टि दैरनेमते मत्तोर.

28 इजिप्त लोकुल्कुना तोल्सूर मर्कुन हक्कालय पेन लोहता दूता, इस्राएलतोर मर्कुन इट्टानायो इंचि, विस्वासम कीताहाटीगे मूसाल, गोर्रिता नेत्तुरतुन लोता दारसाकक होकालय वेहचि, दाटसि होनना पंडुगुन सुस्व कीतोर.

29 विस्वासमहेंदाले, इस्राएल लोकुल्क, वत्तुता भूमिपोर्रो ताकताप, एर्रा समुद्रमते ताकसेके होनना दैरनेम कीतुर. ओरालेह्केन इजिप्त लोकुल्क कियालय हळतुर अय्ते, अव्टेन मुळ्गिसि हातुर.✧

✧ 11:21 उत्पत्ति 48:8-20 ‡ 11:22 नीवा वंसमतोर नालुं नुहकुना वर्सनदाका पगातोर कय्दा हिळु मंदानुर इंचि पेन अब्राहामुंक वेहचि मत्ता. गानि ओर्कुन तिप्पल्क कियानोर्क सिक्सा हीसि नावा लोकुल्कुन अगटाल पेचाह्चि तरकन इंचि पेन वेहचि मत्ता (उत्पत्ति 15:13-14). पेनदा इदे पोल्लेतुन योसेप विस्वासम कीसि इल्हा इत्तोर (उत्पत्ति 50:24-25). ✧ 11:23 निर्गमन 1:22; 2:1-2 ✧ 11:29 निर्गमन 14:21-31

30 विस्वासमहेंदाले, इस्राएल लोकलुक यरिहो सहरता गूरे सुट्टु एडुं रोजकु तिरियतुर, अस्के आ गूरे कूलसि अरता.☆

31 विस्वासमहेंदाले, यरिहो सहरता रहाब इनना वेस्या, तेळियाकौंटा जाळा कियालय वाता इस्राएलतोकुन दाना लोते केय्सी सांतिते सहायम कीता, अदुनहाटीं पेनदा पोल्ले कैजवा लोकलुकुनतोनि दाना नासडेम पेन किया हिल्ले.☆

32 इंका नना बोरा-बोरा बारेमते वेहासेक मंदकन? गिदोन, बाराक, समसोन, इपताल, दाविद राजाल, सामवेलनसोंटा पेनदा कबुरतोर. ईरा बारेमते वेहालय नाकु पुरसत हिल्ले.

33 विस्वासमहेंदाले इरवेटाल इच्चुर लोकलुक राज्येलुक गेलसतुर, इच्चुर लोकलुक सत्तेम कबाहक कीतुर, इच्चुर लोकलुक, पेन हीतन इंचि पोल्ले हीतदुन दोर्किच्चुत्तुर, इच्चुर लोकलुक सिंहाना कतराताल पलाते अरतुर.

34 इंकिच्चुर लोकलुक पोत्तना तडमितुन पिरहातुर, इच्चुर लोकलुक तलवारकुना अयदरताल तपिच्चुना परतुर, इंकिच्चुर बारे बलम हिल्वस्केगुडा बलमगल्लोर्क आतुर, लडाइने वीस्लुक आतुर आनि पराइ देसेमता सिपाइलुकुन गेद्दिमसीतुर.

35 विस्वासमहेंदाले कोन्नि मुरताहकुंक, अवुना हासोल्ता जीवातोरक, मर्रा जीवा अर्सि वापस दोर्कितुर.

गानि इंकिच्चुर मात्रम पेनदापोर्रो विस्वासम इरताहाटीं देब्बां तिचि-तिचि हासोत्तुर. हासि मर्रा जीवाते तेदतस्के, पेन माकु बेसता पिस्वर हिय्यार इत्ता आसेते, इगेटा पिस्वरतुन दक्किच्चुकुनालय पेनदुन होळसा हिल्लुर.

36 इंकिच्चुकुन बारे कारेड्डालुक कीसेके पोट्टेने तंतुर, इंका गोल्लसुकुने दोह्चि जेलने वाटतुर.

37 सगोमतोर्कुन अय्ते बंडाने तंतुर, आरेने कोय्सी तुकडां कीतुर, ओरा पट्टु हळतुर, § तलवारकुने कोह्किसि हव्वकतुर. गरिब-कंगाल आसि दुक्कमते, एटिं-गोर्ना तोल्लुक मुच्चुंकि बेके-बेकेनो तिरियसेके मत्तुर. लोकलुक ओर्कुन बागेने तकलिप कीतुर.

38 दुनियाता लोकलुक, पेनदापोर्रो विस्वासम इतोरालायक मना हिल्लुर. अदुनहाटीं ओर उस्के बूमिने, गुट्टानपोर्रो, पडाने, बंडा सोंरेने मंचेके तिरियुंदुर.

☆ 11:30 यहोसू 6:12-23 ☆ 11:31 यहोसू 2:8-14 § 11:37 इद वचनम कोन्नि पांडु लिपिने हिल्ले.

39 ईरा अंतोरा विस्वासमतुन हळसि पेन अय्ते ओर्कुन मेच्छुत्ता. गानि पेन ओर्कु बद्द आसिर्वाद अय्ते हीतन इंचि पोल्ले हीसि मत्तानो, अद्द आसिर्वाद मात्रम ओर्कु दोर्काहिल्ले.

40 बारित्ते अन्निकन्ना बेसतद् उंदि पोल्ले पेन मनाहाटीं मुन्नेटाले तयार कीसि इरता. अद्द पोल्लेतुन मनाकु, ओर्कु उंदे मल्का दोर्काना इंचि पेन अल्हा कीता.

12

पेन मना बाबाल आंदुर

1 इचोन मंदिता गवाइं, मळ्बुनलेसीं मना सुट्टु आताप मंतां. अदुनहाटीं मनाकुन आपाना हरेक बर्वुन आनि अल्कगा पट्टुने अरहना पापमतुन होळसिसि, पेन मनाकु हुपिस्ता हरदे ओप्केते वितकोम.

2 वितनेके मना नदर येसुनपोर्रेन इरकोम. मनालोप्पो विस्वासमतुन पुट्टिचानोर आनि दान पुरागा कियानोर ओरे आंदुर. मुन्ने दोर्काना आनंदमहाटीं येसु कृसुनपोर्रे जीवा हियालयगुडा तयार आतोर. अगा ओन्क जर्गता अपमानमतुनगुडा लेक्का किया हिल्लोर. इंदके ओर पेनदा राजगद्देता तिना बाजुंक उद्दिदिसि मंतोर.✧

3 पापि लोकुल्क ओना पोर्गेटा पगाते ओन बच्चोनो तिप्पल्क-बादां कीतुर. गानि मिमेट दैरेनेम होळसि विस्वासमताल पजोळ्क आयामन्नि इंचि ओर अवन्नि ओर्सकुत्तोर. मिमेट ओना बारेमते विचारम कीम्तु.

4 मिमेट पापमतोनि लळांच्चेके, उंदि पोल्ले मति इराना. अद्द बतल इत्ते, येसु बल्हा ओना जीवातुन हीतोर, अल्हा मीकु मीवा नेत्तुर पोंगागोट्टाना अक्सरम अर्गहिल्ले.

5-6 मीकुन अंटोर्कुन मर्क-मियाह्क इन्कुंचि, मीकु दैरेनेम हियानाहाटीं पेन मीकु वेहता आ पोल्लेतुन पुरागेन मति मरुंग्तिरा?

“नावा मर्रिना, पेन हीता टेरनिगतुन, मामुल पोल्ले इनकुन्मा.

पेन नीकुन सुद्रांचनस्के, निमे दैरेनेम होळसमा,
बारित्ते, पेन बोन अय्ते पावरम कीतानो ओन्क टेरनिगगुडा हीता.

अचोने आयका, अद्द बोन अय्ते मर्रि इंचि इंतानो,
ओन्क सिक्सागुडा हीता,”
इंचि रासतद् मंता.✧

7 पेन मीकुन दाना मर्क-मियाहकुनलेसीं हळंता. अदुनहाटीं मीकु बस्के अय्ते तिप्पल्क वांतां, अस्के पेन मीकुन सुद्रांचनाहाटीं टेरेनिंग हीसंता इंचि अदुन ओर्सकुंदु. बारित्ते मरिं सुद्रांचनाहाटीं ओन्क टेरेनिंग हियबोर बोरन्ना बाबो मनंतोरा?

8 पेन दाना अंतोर मर्क-मियाहकुन सुद्रांचनाहाटीं टेरेनिंग हींता. आ टेरेनिंगिंटा मीकु दोर्काकोंटे, मिमेट दाना निजम मर्क आयिर.

9 मनाकुन पुटिस्ता मना बाबुर्क अय्ते मनम सुद्रांचनाहाटीं टेरेनिंग हीतुर. अदुनहाटीं मनम ओरा कदरगुडा इरतोम. अय्ते मनम बस्केळक पिस्सि मननाहाटीं, मना आत्मांकु बाबो आता पेनदुक मनम बच्चोन वेल्ले लोंगिस मत्ते बेस? विचारम कीम्टु.

10 मनाकुन पुटिस्ता बाबुर्क, कोन्नि वर्सानाहाटीं ओर्क तेळियताप, मनम सुद्रांचना इंचि टेरेनिंग हीतुर. गानि पेन मना बेसताहाटीं, मनाकुन दानालेहका पवित्र कियालय टेरेनिंग हींता.

11 इंदके इव टेरेनिंगकु येतनेंके मनाकु कुसि अनपिच्चो, दुक्कम वांता. गानि बोर अय्ते ओर्सकुंचेके टेरेनिंग बेस मनसु तासि करियंतुरो, ओर्कु सत्तेम, सांतिंते निंडता पिस्वर दोर्कता.

12 अदुनहाटीं, अरसोत्ता मीवा कय्कुन आनि ताकत हिलुवा मीवा टोंगरन मजबुत कीम्टु.✧

13 मिमेट मीवा विस्वासमता हरदे सवरगा ताकाटु.✧ अस्के बोर अय्ते विस्वासमते कुंटी आसि मंतोरो, ओर विस्वासमते इंकिच्चो कुंटी आयाकोंटा गट्टिट पळानुर.

विस्वासमते पिसानोर्क कोन्नि जेगर्तां

14 अंतोर मनकालोरतोनि सांतिंते कलियसि पवित्र मनना कोसिस कीम्टु, अल्हा मनाकोंटे बोरे मनकल सामिनगा होना पर्रोर.

15 पेनदा कुर्पाताल वरोरगुडा तप्सोनामन्नि इंचि जेगर्ता मंटु. अल्हा तप्सोचि हेळतोर बोरन्ना मी नड्डुम मनानय्ते, ओर कळमातोर्कुन हेळाहचि, पेनदाल लक्कु कींतोर. इदुन जरा जेगर्ता हुळट.✧

16 मीवा नड्डुम बोरे व्यबिचारम कियानोर हिलाकोंटे, एसावुनलेसीं नीति हिलुवा मनकल मनामन्नि. उंदि पूताता गाटोहाटीं ओर ओना जेस्टम पालुंक विलुवा हिय्याकोंटा तम्मूंक अम्मुकुत्तोर.✧

17 पजा एसावुना गति बतल आता मीक अय्ते तेळियसे मंता. वारसान हक्कुनाहाटीं बाबोनगा आसिर्वाद येतालय होत्तस्के, बाबो ओन्क आसिर्वाद हिय्या हिल्लोर. ओर अळसि-अळसि वेल्ले कोसिस कीतोर गानि ओन्क मनसु मार्सकुनालय मोका दोर्काहिल्ले.✧

18-19 इस्राएल लोकुल्क अय्ते कय्दे इट्टा परीनाल मत्ता गुट्टातगा होत्तुर. अद गुट्टा तळमिते पोतसेके मत्ता, हिर्-हीकाटा, वळि-दुमारम, अद गुट्टातगा मत्ता. गानि मिमेट अय्ते असोंटा गुट्टातगा होना हिल्लिर. अद गुट्टातगा इस्राएल लोकुल्क, तूताकोमता आवाज आनि पेनदा वळ्ळकना पेद्दा लेंगुन केंजतुर. केंजसि, “मर्ी बस्केने इसोंटा लेंग माकु केंजा वायामन्नि” इंचि पेनदुक विनंति कीतुर.✧

20 बारित्ते, “इद गुट्टातुन, उंदि जिवरासि इट्टिना, दान बंडाने तंचि हळ्ळकाना,” इंचि पेन आदेस हीसि मत्ता, अद आदेसतुन ओर सहन किया परीहिल्लुर.✧

21 अगा जर्गता गटना इच्चोन वेरियानाल मत्ता गदा, अदुना बारेमते मूसालगुडा, “नना इरगा वेरियसि गजा-गजा आसंतन,” इंचि इत्तोर.

22 गानि मिमेट अय्ते सियोन गुट्टातगा वातिट. जीवाते मनना पेनदा, स्वर्गमते मनना येस्सलेम सहर इदे आंद. कुसिते उंदगा जमा आता, लेक्का हिलुवच्चोन पेनदा दूतानगा मिमेट वातिट.

23 नीतिमंतुड लोकुल्कुना आत्माना कलिसियातगा मिमेट वातिट. आ कलिसियातगा अंटोरा पोरोलीं रासि मंतां, अंटोर्क जेस्टम पालना अदिकारम मंता. अंटोर्कुन पेन दानतोनि मनालय पुरागा कीता. दुनियाते मनना अन्निटवुना न्यायम कियाना पेनदागा मिमेट वातिट.

24 इंका पूना करारता नड्डुमतोर आता येसुनगा मिमेट वातिट. आदामना मर्ी आबेलना नेत्तुर इत्ते, ओना दादाना बद्दला येतालय पेनदुन केयताप मत्ता.✧ गानि येसुना नेत्तुर अय्ते मीवापोर्गे सल्लिस मीवा पापाल्कुन मापि कीम इंचि पेनदुन केयताप मंता.

25 इद दुनियाते, लोकलुकुंक जेगर्ता मनालय पेन वेहतस्के, ओर पेनदा पोल्ले केंजा हिल्लुर. अदुनहाटी ओर पेन हीता सिक्साताल तपिचकुना परीहिल्लुर. अय्ते इंदके मनम स्वर्गमताल वेहनोना पोल्लेतुन केंजाकोंटे, पेन हिय्यना सिक्साताल बल्हा तपिचकुना परीतोम? अदुनहाटी जरा जेगर्ता मंडु, बोर अय्ते वळकसंतोरो ओना पोल्लेन पास्काकोंटा, बेस केंजट.

26 अद कालमते पेन वळकतस्के, दाना आवाजते, बूमिअंता गजा-गजा ऊंगता.☆
गानि इंदके, “नना सिराप बूमितुने आयो गानि, मब्बुनगुडा मसंदि मल्का गजा-गजा ऊपांतन,” इंचि पेन पोल्ले हीता.☆

27 “मसंदि मल्का” इनना पोल्लेता अर्तम बतल इत्ते, इद दुनियाते गजा-गजा आयानव बव अय्ते मंतांगो, अव अन्नि तयार कीतव आंदुं, अदुनहाटी अव नासडेम आसि दांतां, गानि बव अय्ते गजा-गजा आयाकोंटा मनंतांगो, अव बस्केळ्ळ अल्हेन मनंतां.

28 बोर कदलिच्चा पस्वसोंटा राज्येम मनाकु दोर्कसेक मंता. अदुनहाटी मनम पेनदुक दन्यवाद वेहकोम. अचोने आयाका, दाना वेंर मनसुने इर्सि दाना सेवा कीसेके, दान्क नच्चना आरादना कीसेके मंदकोम.

29 बारित्ते, मना पेन, बूळ्दि कीसि पोहना तळमिलेसीटद आंदु.☆

13

पेनदुन कूस कियमळ

1 मिमेट अंतोर उंदि लोतोरलेसी वरोंक-वरोर पावरम कीसेके मंडु.

2 वाता हेळमितोर बोर आयिर, ओर्कुन बेस हळकुंदु. इल्हा इच्चुर लोकलुक, एरपाट कियाकोन्नागानि पेनदा दूतन बेस हळकुत्तुर.

3 पेनदुन विस्वासम कीताहाटी बोर अय्ते जेलने मंतुरो, ओरा मति कीतस्के, मिमेट कुद्दु ओरतोनि जेलने मत्ताप विचारम कीम्दु. अल्हेने, बोर अय्ते पेनदुन विस्वासम कीताहाटी तिप्पल्क बोगांचेके मंतुरो, ओर्कुन मति कीतस्के मिमेट कुद्दु ओरतोनि तिप्पल्क बोगांचेके मत्ताप मति कीम्दु.

4 मरमिन आनि मुत्तो-मुय्दोना संबंदमतुन कदर कियाना, ओर वरोनपोरों विस्वासम कीसि बदनाम आयाकोंटा मंदना. व्यबिचारम कियानोर्कुन आनि

☆ 12:26 निर्गमन 19:18 ☆ 12:26 हागै 2:6; न्यायियों 5:4; बजन सहिता 68:8

☆ 12:29 व्यवस्ताविवरन 4:24; व्यवस्ताविवरन 9:3; यसायाह 33:14

बोगमतनम कियानोर्कुन पेन न्यायम कीता, इदुन मतिते इर्शट. अदुनहाटीं मुत्तो-
मुय्दो वरोनपोर्री वरोर विस्वासम कीसि बदनाम आयाकौंटा मंदना.

5 दनमताहाटीं मिमेट आसे पडानायो. मिहगा बतल अय्ते मंता अव्टेन कूस मंट.
बारित्ते पेने कुद्दु इल्हा इत्ता:

“नना नीकुन बस्केने होळसोन, नना नीकुन बस्केने दिक्कु हिल्वोन किय्योन,” ☆
इंचि वेहता.

6 “अदुनहाटीं, मनम, पेन नाकु सहायम कियानद आंद,

नना असले वेरियोन, मनकल नाकुन बतल किया परांतोर?” ☆
इंचि दैरनेमते इना परांतोम.

7 मीकु मोट्टा मोदाला पेनदा पोल्ले वेहता मीवा पेद्दाल्कुन मति कीम्ट.
ओर बल्हा आकिरदाका पेनदापोर्री विस्वासम इरसि पिस्तुरो मति कीसि, अल्हेन
मिमेटगुडा ताकट.

8 येसु किरिस्तु मुन्ने मत्तापे, इंदके आनि बस्केळ्दाकागुडा मारियाकौंटा उंदेतीर
मंतोर.

9 अदुनहाटीं, वेंरेतोर वासि कराहना रका-रकाल्कुना बोदां केंजसि मिमेट गयबेत
आयमट. बोनके बतल पायदा वायवा, तिंदाना नियमकुन पीसि तनलाळसेक मत्ते
मना मनसुंकु ताकत दोर्को, गानि पेनदा कुर्पातेन मनसुंकु ताकत वांता.

10 मनागा उंदि इसौंटा गद्दे मंता गदा, आ गद्देपोर्रींटा गाटो डेराने सेवा कियाना
यहुदि याजकुल्कुंक तिनना अदिकारम हिल्ले.

11 बारित्ते, पापाल्क मापि आयानाहाटीं मोळ्कालय, पेद्दा पेर्मल जिवरासिना
नेत्तुरतुन अय्ते अन्निकन्ना पवित्र जेगाते ओंतोर, गानि जिवरासिना मेंदुल्लुन मात्रम
डेराता पलाते बोळसंतुर. ☆

12 अय्ते येसुगुडा, ओना नेत्तुरते लोकुल्कुन पवित्र कियानाहाटीं येस्सलेम
सहरता पलाते तिप्पल्क बोगांचि जीवा होळसंतोर.

13 अदुनहाटीं वट्ट! मनमगुडा येसुना पोर्रींटा अपमानमतुन मनापोर्री येतकुंचि,
येसुनालेसी तिप्पल्क बोगांचालय डेराता पलाते दाकोम.

14 इद दुनियाते हमेसा मनालय मनाहाटीं बदे सहर हिल्ले. गानि वायाना
कालमते मनाहाटीं तयार आयाना सहरते मनालय, आसेते मंतोम.

15 अदुनहाटीं, येसु मनाहाटीं कीतदुन मति कीसि, बस्केळ्ळक मना तोळ्दाल पेनदा पोरोल येतसि, पारतना-दन्यवादाळ्कुना मोक्कुल्क हीसेक मंदकोम.

16 वेरेतोराहाटीं बेस कियमळतुन आनि मिहगा मत्तवेटाल ओर्कु तूस हियमळतुन होळ्समट. इल्हा कियमळगुडा उंदि मोक्के आंद. दीनहेंदाल पेन कूस मनंता.

17 मीवा पेद्दाल्क वेहताप मिमेट ताकट. ओर्कु लोंगिस मंटु. मीवा जीवाता कावेल कियमळे ओरा जिम्मेदारि आंद. ओर्कु मीवा बारेमते, पेनदागा लेक्का हिय्या पीता. ओर वेहताप मिमेट ताकते, ओरा कबळ ओर कुसिते कीतुर, हिलाकोटे ओर दुक्कमते कबळ कीतुर. ओर दुक्कमते कबळ कियानय्ते मीकु बतल पायदा वायो.

18 माहाटीं पारतना कीसेके मंटु. अन्नि तीरकुने मोमोट निजम बतल अदे कीसेके, बेस कदरते पिस्सेक मंतोम. इंका मावा बुद्दिगुडा सत्तेम मंता इत्ता बरोसा माकु मंता.

19 अचोने आयाका, नना मीकु विनंति कीसि वेहना पोल्ले बतल इत्ते, पेन नाकुन बच्चोन बिराना आते, अचोने बिराना मिहगा लोहना इंचि पारतना कीम्दु.

20-21 सांति हिय्यना पेन दाना विचारम परकारम मिमेट कियालय, मीकु अन्नि तीरकुना बेसता पोल्लें हिय्यि. येसु किरिस्तुनाहेंदाल मीवा पिस्वरते दान्क नच्चना पोल्लें जर्गि. किरिस्तु येसुना नेतुरहेंदाल पेन मातोनि बस्केळ्ळक मननाहाटीं पूना करारतुन निल्हाता. इद पूना करार निल्लना इंचि पेन येसुन हामुरताल मर्रा जीवाते तेहाता. इल्हा येसु किरिस्तु मावा बेस मेहानोर आतोर. मनकालोर अंतोर बस्केळ्ळाहाटीं ओन्के कदर हिय्यिर. आमीन.

आकिरता पोल्लें

22 विस्वासुल्कुनिटा! मिमेट पेनदा बक्तिते इंकिचो गट्टि पळना इंचि, इव इच्चुं पोल्लें नना इद सिट्टिते मीहाटीं रासतन. इवुन बेस सहन कीसेके केंजट इंचि नना मीकु विनंति कीसंतन.

23 मना तम्मुनसोंटा तिमोति जेलनाल पेय्सता पोल्लेतुन मिमेट तेल्लिचकुंटु. ओर ओक्कला नहगा बिराना वाते, नना ओनतोनि, मीकु कलियालय वांतन.

24 मीवा लीडरकुंक आनि पेनदा अंतोर पवित्र लोकुल्कुंक, नावा जोहार वेहाट. इटलि देसेमते मनना विस्वासुल्क मीकु जोहार वेहासेक मंतुर.

25 पेनदा कुर्पा मी अंतोरतोनि बस्केळ्ळक मन्निकांटी. आमेन.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068